

# JNUHUN VAHA NI TEE SAN JUAN

## Yaā naní Jnúhun Yaā Dios ni nduu ya tēe

**1** Nde xihna nñuhún ná ni jecōo ndihí jeē iyó, te je íyó Yaā naní Jnúhun Yaā Dios, chi steén yā ndihí jnūhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. <sup>2</sup>Máá yá ndéé yá nde jeē xihna nñuhún jíin Yaā Dios. <sup>3</sup>Te ni sáha Yaā Dios jeē jíin máá yá ni jecōo ndihí tāca jéé iyó. Te ma jécōo ni ñin jeē iyó núu tu ní sáha máá yá. <sup>4</sup>Máá yá sáha jeē técu ndihí-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios. <sup>5</sup>Te Yaā cúu luz ún ndíndēe núu ñayuu tu cájica ndaā, jeē nájñuhun cáhīyo i nuū néē. Te ñayuu cáhīyo nuū néē tu cúu ndahva i luz yā.

<sup>6</sup>Te ni iyo ñin tēe jeē ní tají Yaā Dios, naní de Juan. <sup>7</sup>Tēe un ní quiji de jeē nácani cájī de jnūhun máá Yaā cúu luz, návāha candíje tāca ñayuu jeē jíin jnúhun cáhán de. <sup>8</sup>Nasūu máá Juan cúu luz ún, chi cúu de ñin jeē ní nacani cájī jnúhun máá luz un. <sup>9</sup>Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayiví.

<sup>10</sup>Te Yaā cúu Jnúhun Yaā Dios ni condee yā ini ñayiví, te vésú jeē jíin

máá yá ni sáha Yaā Dios ñayiví, te ñayuu ñayiví tu ní cáacuni i cuatáhú i jeē maá yá cúu. <sup>11</sup>Ni quiji ya nuū ñayuu maá yá nacióon hebreo, te ñayuu ún tu ní cájetáhú i ya. <sup>12</sup>Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū maá i ni jēhe ya jnūhun jeē ndúu i sēhe Yaā Dios. <sup>13</sup>Te jeē ndúu i sēhe Yaā Dios, nasūu jíin modo jeē cácacu ñayuu ini ñayiví, ni nasūu síquī jeē cáacuni tēe, chi máá Yaā Dios sáha ya jeē ndúu i sēhe ya.

<sup>14</sup>Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéé yóhoyo luu cújéhnu ya, chi máñuhún-ni ya cúu Sēhe Tátá yā, Yaā cújéhnu súcuan. Te máni máá jéé sáha ya jeē váha yóhó, te máni máá jnúhun ndaā cahán yā. <sup>15</sup>Te Juan ni nacani de jnūhun ya, te ni cahán de:

Yaā váha cúu jeē ni cáhán rī náa áchí rí jeē Yaā quiji chi cújéhnu ga yā vésú ruhū, chi je íyó yá nde ná tu cacu ri, achí de.

<sup>16</sup>Te ndihí yó ní canihín yō cuehē ndasí jeē váha íyó núu yā, chi máni jeē váha sáha sáha ya jíin yó. <sup>17</sup>Moisés ni steén de ley Yaā Dios nuū ñayuu jenahán, te Jesucristo

chi sáha ya jeē váha yóhó te stéén yā tāca jnúhun ndaā Yaā Dios nuū yō. <sup>18</sup>Tú ni ìin ñayuu ni jíto cuíti nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

**Jnúhun Jesús jeē ni cáhān Juan tēe scuándute**

(Mt. 3.11-12; Mr. 1.7-8; Lc. 3.15-17)

<sup>19</sup>Te ñayuu hebreo ñuu Jerusalén, ni catajǎ i jecu sutú jíin tēe grupo levita jeē cájejnǎnu ini templo, ni jengoo de nuū Juan, návāha cajnúhún de ndé ìin cúu Juan te na jniñu ndíso de. <sup>20</sup>Te Juan cájǎ ní cachi de:

Nasūu rúhū cúu Cristo, achí de.

<sup>21</sup>Te ni cacajnúhún tucu de:

Núu súcuan ¿te ndé ìin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahān Juan:

Nasūú de cúu ri.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ìi jeē quǎji?

Tuú, áchí tucu Juan.

<sup>22</sup>Te ni cacahān tucu jíin de:

¿Te ndé ìin cúu ró núu súcuan? Cachi nuū ri jijnáhan ri, chi jíni ñúhún castúhun rí nuū tāca tēe ni catajǎ rúhū vējicoo ri. Cachi na jniñu ndíso ró ví.

<sup>23</sup>Te ni cahān Juan:

Máá rí cúu tēe jeē ni cáhān Isaías, tēe ni nacani jnúhun Yaā Dios nde jenahán, jeē quǎji ri cana jee rí nde nuū ñúhun téhé. Te cáhān ri jíin ñáyuu jeē na sátúhva i máá i, chi quǎji máá Jítóho yō. Achí Juan.

<sup>24</sup>Te tēe grupo fariseo cácuu jeē ní catajǎ tēe ni quǎjicoo ún. <sup>25</sup>Te ni cacajnúhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quǎji nacani jnúhun Yaā Dios cúu ró?

<sup>26</sup>Te ni cahān Juan:

Ruhū chi jíin ndute scuándute ri. Te mēhñu ró jijnáhan ró ìne ìin Yaā jeē tu cájini rō. <sup>27</sup>Te Yaā un cúu jeē ni cáhān rí jeē quǎji ya te cújéhnu ga yā vēsú ruhū. Chi tú na vé jéhnu cuíti cúu ri nuū yā, ni jeē cuajniñu ri nuū yā vēsú ìin jniñu lúlí gá nájnúhun jeē ndajǎ rí correa ndijēn yā. Achí de.

<sup>28</sup>Súcuan ni cuu jeē ní candajnúhún de jíin Juan nde Betábara jeē ìne ichi núu cáne niāndii yūte Jordán, nuū scuándute Juan.

**Siquǎ jeē cúu ya Londe Yaā Dios**

<sup>29</sup>Te ìnga quǎvǎ un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jijnáhan ró, chi yāha véji Yaā cúu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayǎví. <sup>30</sup>Yaā yáha cúu jeē ni cáhān rí jeē quǎji ìin Yaā cújéhnu ndasí, chi je íyó yá nde ná tu cacu ri. <sup>31</sup>Te nde saá te tu ní jíin rí jeē yāha cúu Yaā ní tajǎ Yaā Dios. Te ni quǎji ri jeē scuándute ri ñayuu ñuu yō Israel jíin ndute, návāha stéén rí nuū i jeē suu ya cúu, áchí Juan.

<sup>32</sup>Te suni ni cahān gā de jnúhun ya:

Ni jito ri Espírиту Santo, ni cuun ya ichi ándiví, cáa ya nájnúhun paloma, te ni quee ya xiní Jesús.

<sup>33</sup>Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jēē cúun Espíritu Santo te quendōo xinī iin tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios. <sup>34</sup>Te je ni jito ri ún, te nácani cájī rí jnūhun jeē máá yá cúu Sēhe Yaā Dios. Achí Juan.

#### Uū tēe jeē ní cana ya xihna gā

<sup>35</sup>Te inga quivī ún te Juan íne tucu de yūcuan jíin úu tēe cájica jíin de. <sup>36</sup>Te ni jito de nuū Jesús jeē jíica ya yūcuán. Te ni cahān de:

Condēhe jíjnáhan ró, chí yūcuan cúu Yaā cúu Londe jeē ní tají Yaā Dios.

<sup>37</sup>Te ndíndúú tēe cájica jíin Juan ni cajini sōho de jnūhun yáha, te ni candiquín de Jesús. <sup>38</sup>Te ni ndió cóto Jesús, te ni jito ya jeē cándiquín de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

<sup>39</sup>Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chí nájñūhun cacuūn jehíni cúu.

<sup>40</sup>Te Andrés, ñani Simón Pedro, cúu iin jeē ndíndúú tēe un jēē ní cajini sōho jnūhun ni cahān Juan, te ni candiquín Jesús. <sup>41</sup>Te Andrés, yachī ni jenanducú de ñani de Simón, te ni cahān de jíin:

Ni caquijnáhan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

<sup>42</sup>Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yuū.

#### Jeē ní cana ya Felipe jíin Natanael

<sup>43</sup>Te inga quivī un cúní Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquín ruhū na quihín yō.

<sup>44</sup>Te Felipe cúu tēe ñuu Betsaida, jeē cúu ñuu Andrés jíin Pedro. <sup>45</sup>Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jnūhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

<sup>46</sup>Te ni cahān Natanael jíin de:

¿Te ndese cúu cujéhnu iin tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

<sup>47</sup>Te ni jito Jesús jeē véjī Natanael, te ni cahān yā:

Yáha véjī iin tēe ndaā jeē cúu ndije yucūn Israel, chí tu stáhú cuíti de, achí yá.

<sup>48</sup>Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē nundéhe higo, achí yá.

<sup>49</sup>Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

<sup>50</sup>Te ni cahān Jesús:

¿A máá jéē ni cáhān rī jeē ní jito rī rohó ná íne ró jéhē nundéhe higo, te jeē yúcuan cándíje ró rúhū naún? Tuú chí coo jniñu jéhnū ga coto ró vesú jeē yáha, áchí yá jíin de.

<sup>51</sup>Te ni cahān gā yā:

Jendaá cahān rī jíin ró jijnáhan ró jéē nde vijna te coto ró jéē núne andiví, te táca ndajéhe Yaā Dios cándaa cánuu nuū ruhū, Yaā ní nduu tēe, áchí yá.

### Jeē ni jéhēn yā iin vico nándāha ñuu Caná

**2** Te ni yāha unī quivī, te ni iyo iin vico nándāha ñuu Caná ndañū Galilea. Te yúcuan íne náná Jesús. <sup>2</sup>Te suni ni cacana i Jesús jíin tēe cáscuáha jíin yá, ni jehēn yā vico un jíin de. <sup>3</sup>Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

<sup>4</sup>Te ni cahān Jesús jíin ña:

¿Naun cáhān ni súcuan jíin ná náná? Chí ná tu quee quivī jeē sáha ná jniñu jéhnū, áchí yá.

<sup>5</sup>Te náná yā chí ni cahān ña jíin ñáyuu cájeni cohō:

Sáha ró jíináhan ró táca jéē cahān yā jíin ró. Achí ña.

<sup>6</sup>Te yúcuan íyó íñū tenéjā yuū jeē ñúhun ndute cájichi ñáyuu hebreo jeē ndúndoo i nuū Yaā Dios. Te iin iin tenéjā un cánda cuhun cuūn xico chí ciento litro ndute. <sup>7</sup>Te ni cahān Jesús jíin ñáyuu cájeni cohō:

Scútú ndíí rō táca tenéjā yáha.

Te ni cascútú ndíí i. <sup>8</sup>Te ni cahān yā jíin i:

Vijna te quēen ró jecu te quindecia ró coto ndee tēe ndíto vico, áchí yá.

Te ni cajendeca i nuū de. <sup>9</sup>Te ni séyūhú de ndute jeē ní nduu vino, te tu jíin de ndé ní canihīn i. Chí máni mozo un cúu jeē cájini, chí máá i ni caquēen ndute ún. Yúcuán na te tēe ndíto vico ni cana de tēe nándāha. <sup>10</sup>Te ni cahān de jíin:

Tāca ñáyuu chí xihna gā vino váha cájēhe i, te núu je ni cajihī vāha ñáyuu cáhiin vico, yúcuán na te jéhe de vino ndahú na. Te máá ró tucu ni sáha ró, chí nde jeē sándíhí te jéhe ró vino jeē yóhoyo vāha ga jíhī, áchí de.

<sup>11</sup>Jniñu yáha jéē ni sáha Jesús ini ñuu Caná ndañū Galilea cúu jniñu jéhnū xihna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnū ya. Te tēe cáscuáha jíin yá ni cacandíje de ya.

<sup>12</sup>Te ná ni yāha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yúcuán jecu quivī.

### Jeē ní quenehen ya ñáyuu ini templo

(Mt. 21.12-13; Mr. 11.15-18; Lc. 19.45-46)

<sup>13</sup>Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén. <sup>14</sup>Te ini templo cáhnu ni jito ya ñáyuu cáxicó stiquī jíin lanchi jíin paloma, jíin ñáyuu castáyī xūhun, cáyucú i nuū mesa i. <sup>15</sup>Te jeē súcuan ni jito ya, te ni sáha ya iin cuarta ñi. Te ni scúnu ya táca i ini templo, nde jíin lanchi jíin stiquī i. Te ni jete yā xūhun ñáyuu castáyī. Te ni scotúú yá táca mesa i. <sup>16</sup>Te ni cahān yā jíin ñáyuu cáxicó paloma:

Tava t̄acá quiti yáha. Te ma sáha ró yáhu ini vehe Tátá rī. Achí yá.

<sup>17</sup>Yūcuán na te t̄e cáscuáha jíin yá, ni canucūhun ni de jnūhun yósó núū tútu ii: Je yajni cuu na j̄eē yóhyo nd̄íhvī ni na síquī vehe ní, achí yá jíin Tátá yā, achí tutu.

<sup>18</sup>Te t̄e ñuu yā hebreo ni cacajnūhún de ya:

¿Na jniñu j̄ehnu sáha ró j̄eē steén rō poder rō, te cucáhnu ni rī jeē nd̄íso jniñu ró sáha ró súcuán? achí de jíin yá.

<sup>19</sup>Te ni cahān yata Jesús:

Canu rō templo yáha, te nuū uní quivī te nucondichi sáha ri, achí yá.

<sup>20</sup>Yūcuán na te ni cacahān t̄e hebreo un:

Uū xico iñū cuiyā te ni jīnu ni cuvāha templo yáha. Te rōhó, ¿á núū uní-ni quivī te nucondichi sáha ró naún? Achí de.

<sup>21</sup>Te templo jeē cahān Jesús cúu máá yiqui cúñu yā, chi cahni ñayuu yā te natecu yā nuū uní quivī. <sup>22</sup>Jeē yúcuán cúu jeē ná ni natecu yā jeē ni jíhī yā, te t̄e cáscuáha jíin yá ni canucūhun ni de jeē ni cahān yā jnūhun yáha. Te ni cacand̄ije de jnūhun jeē yosó núū tútu ii, jíin jnúhun yáha j̄eē ni cahān Jesús.

### Jeē jíiní Jesús ndese cāa ini anuá ñayuu

<sup>23</sup>Te ná íne Jesús ñuu Jerusalén máá vico pascua, te cuehē ñayuu ni cacand̄ije i jeē cúu ya Cristo, chi ni cajito i t̄acá jniñu j̄ehnu sáha ya jeē steén yā poder yā. <sup>24</sup>Te máá Jesús chi tu ní jétáhú yá i, chi je jíiní yā ndese cāa ini anuá i jíjnáhan i. <sup>25</sup>Te tu jíiní nūhún yá jeē cáchi ni iin ñayuu nuū yā ndese íyó táca ñayuu,

chi máá yá je jíiní yā ndese cāa ini anuá i.

### Jeē ní candajnūhún Jesús jíin Nicodemo

**3** Te ni íyo iin t̄e grupo fariseo, naní de Nicodemo, te cúj̄ehnu de nuū ñáyuu ñuu de hebreo. <sup>2</sup>T̄e yáha ní quiji de nuū Jesús iin jecuáa, te ni cahān de jíin yá:

Maestro, je cájini na j̄eē maá Yaā Dios ni tají yá nihín j̄eē steén ni jnūhun ya nuū na jíjnáhan ná. Chi núu tu íyó Yaā Dios jíin ní, te ma cúu sáha ní ni iin jniñu j̄ehnu nájnūhun sáha máá ní jeē steén ni poder ní, achí de.

<sup>3</sup>Te ni cahān Jesús:

Jendaá cahān rī jíin ró jeē núu tu nacacu jeē iin ñayuu, te ma cúu quivī i ndaha Yaā Dios jeē ndacu ya jniñu nuū i, achí yá jíin de.

<sup>4</sup>Te ni cahān Nicodemo jíin yá:

¿Te ndese cuu nacacu iin t̄e te núu je ni jehnu de? ¿A cuu nucūhun tucu de chiji náná de te nacacu tucu de? achí de.

<sup>5</sup>Te ni cahān Jesús:

Jendaá cahān rī jíin ró jeē núu tú nacacu iin ñayuu, te ma cúu quivī i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnūhun jíin ndute, te condee Espírиту Santo ini anuá i. <sup>6</sup>Jeē cácu sáha ñayuu, chi s̄ehe ñayuu cúu. Te jeē cácu sáha Espírиту yā, chi s̄ehe ya cúu. <sup>7</sup>Ma náa ni rō cani ni rō ndese cúu jnūhun ni cahān rī jíin ró jeē cánuú j̄eē nacacu jeē ró jíjnáhan ró. <sup>8</sup>Te tachī chi quée cuahān ndé-ni cúu nuū cuní máá, te jíiní sōho ró j̄eē cáyu, te tu jíiní rō ndé nuū véji ni

ndé nuū quihín. Te suni súcuan cúu taca ñáyuu jeē nácacu sáha Espiritu, chi tu jíni rō ndese sáha ya jniñu ún, áhí yá.

<sup>9</sup>Te ni cahān tucu Nicodemo:

¿Ndese ga cúu núu súcuan?

<sup>10</sup>Te ni cahān Jesús:

Máa ró cúu ñin maestro jeē cujúhnu nuū ñáyuu ñuu yō Israel, te zá tu jécūhun ni rō jñūhun yáha naún? <sup>11</sup>Jendaá cahān rī jíni ró jeē jñūhun cájecūhun ni rī cúu jeē cácahān rī jíni ró. Te cánacani cáji rí jñūhun jniñu ní cajito ri. Te tu cácañdije ró jñūhun cácahān rī. <sup>12</sup>Chi ni cahān rī jñūhun ndese sáha Yaā Dios ini ñayiví, te tu cácañdije ró. Núu súcuan ¿te ndese candije ró núu cahān rī jñūhun taca ndese sáha ya nde andiví?

<sup>13</sup>Chi ni ñin tu ní caa andiví jeē cúni ndese íyó yúcuan, chi mañúhún-ni ruhū, Yaā ní nduu tēe. Chi andiví ndéé rí, te ni cuun ri vēji ri. <sup>14</sup>Te nájnūhun ni cata caa Moisés ñin coō cāa nuū ñin yujnu, ná ni cajica ñayuu nuū ñūhun téhé, suni súcuan máa rí, Yaā ní nduu tēe, cánuú jéé cóndita caa ri jicā cruz. <sup>15</sup>Te súcuan cánuú návāha taca ñáyuu jeē candije i jeē jnáma ri i, ma jnahnú ndetū i, chi sa suhva cotecu i ní cáni andiví.

**Yōhyo ni cundáhú ni yā ñayuu ñayiví**

<sup>16</sup>Chi Yaā Dios yōhyo ni cundáhú ni yā ñayuu ñayiví. Jeē yúcuan ní tají yá Sēhe ya ni quiji, vēsú mañúhún-ni ya iyó, návāha taca ñáyuu jeē candije i jeē jnáma ya i, ma jnahnú ndetū, chi sa suhva cotecu i ní cáni andiví. <sup>17</sup>Chi tu ní tají Yaā Dios Sēhe ya ini ñayiví

jeē snahnú ndetū yā ñayuu, chi sa suhva jeē jnáma ya ñayuu.

<sup>18</sup>Ñayuu jeē candije i jeē jnáma ya i, ma jnahnú ndetū i. Te ñayuu tu cándije, je ni jnahnú ndetū i, chi tu ní cándije i máa Sēhe Yaā Dios, te máa ñin-ni ya iyó. <sup>19</sup>Máa Yaā jeē stíndéé ini anuá ñayuu, je ni quee ya ini ñayiví. Te cánujnahān gā ni ñayuu caca i nájnūhun nuū néé vēsú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñayuu tu cácañdije ún. <sup>20</sup>Chi taca ñáyuu casáha jniñu néé, tu újnahan cuiti ni i luz yā. Te tu jéhe i jñūhun jeē stíndéé yá ini anuá i, chi tu cúni i jeē natūu jniñu néé cásáha i. <sup>21</sup>Te ñayuu jeē cájica jíni jniñu ndaā, jéhe i jñūhun jeē stíndéé yá ini anuá i, návāha natūu ndijin jeē taca jniñu cásáha i cúu jniñu cúni Yaā Dios. Achí yá jíni de.

**Jeē ni cahān tucu Juan jñūhun Jesús**

<sup>22</sup>Yūcuán na te Jesús jíni tēe cáscuáha jíni yá, cuahān yā región Judea. Te ni condee yā yūcuán jecu tiempo jíni de, te cáscuándute de ñayuu. <sup>23</sup>Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñayuu nuū de, te ni scuándute de i. <sup>24</sup>Súcuan ni sáha Juan nde ná tu quiví de vecāa.

<sup>25</sup>Yūcuán na te sava tēe cáscuáha jíni Juan yōhyo ni cacahān de jíni sava jnáhan de hebreo siquí núu ndé ñin cúu modo vāha ga jeē cúchi ñayuu ndundoo i nuū Yaā Dios.

<sup>26</sup>Te ni quecoo de nuū Juan, te ni cacahān de:

Maestro, tēe ní ine jíni ní yūte Jordán ichi núu cáne niāndii, jeē ní

nacani ní jnúhun de nuū ná, vijna te scuándute máá de, te ndívii ñayuu cuangoo i nuū de.

<sup>27</sup>Te ni cahān Juan:

Ni iin tēe ma cúu sáha de jniñu Yaā Dios te núu ma tejniñu ya de.

<sup>28</sup>Máá ró jijnáhan ró chi ni cajini sōho ró jēē ni cáhān cají rí jeē násūu máá rí cúu Cristo, chi cúu ri iin jeē ní tají Yaā Dios jeē cósnūú nacani jnúhun jeē quíji ya. <sup>29</sup>Te núu cásáha vico quíjnáhan, te máá yii cúu jeē ndéca ñasihí. Te amigo yii un íne jíin de, te jíni sōho jnúhun cáhán de. Te yōhyo cúsiī ni jíni sōho jnúhun cáhán yii ún. Te suni súcuan ruhū, chi cúu ri nájñuhun amigo yii, chi ni quee maá Cristo, te yōhyo cúsiī ni rí jíni sōho ri jnúhun cáhán yā. <sup>30</sup>Te jíni ñúhún jēē ndujéhu ga maá yá te ndululí gá maá rí, achí Juan.

#### Jeē ní quíji ya nde nuū sucún

<sup>31</sup>Te Yaā jeē véji nde andíví, cújéhu ya nuū ndíhi. Chi tāca jēē ní cacu ini ñayīvi yáha, sēhe ñayīvi cúu, te máni jnúhun ñayīvi cáhán. Te Yaā jeē véji ichi ándíví, chi cújéhu ya nuū ndíhi ñayuu. <sup>32</sup>Te nácani ya jnúhun jeē ní jito ya jíin jēē ní jini sōho ya. Te ñayuu chi tu cándíje i jnúhun cáhán yā. <sup>33</sup>Te núu iin ñayuu candíje i jnúhun cáhán yā, suu cúu jeē jejnúhún i jeē Yaā ndaā cúu Yaā Dios. <sup>34</sup>Chi Yaā ní tají Yaā Dios véji, máni máá jnúhun Yaā Dios cahán yā. Chi Yaā Dios tu yícuāha jéhe ya Espíritu ya nuū Yaā ní tají yá. <sup>35</sup>Máá yá jeē cúu ya Tatá, yōhyo maní yā jíin Séhe ya, te ndívii ni jēhe ya ndaha Séhe ya jeē ndacu ya jniñu nuū. <sup>36</sup>Ñayuu jeē

candíje máá Séhe ya jeē jnáma ya i, cotecu i níí cáni andíví. Te ñayuu tu cúní candíje Séhe ya, ma cótecu i níí cáni andíví, chi sa suhva cuāha Yaā Dios castigo jeē ndoho i níí cáni.

#### Jeē ni cáhān Jesús jíin ñahan ñúu Samaria

**4** Te tēe grupo fariseo, ni canihín de jnúhun jeē iyó cuéhē gā tēe cáscuáha jíin Jesús vésú jíin Juan, jíin jēē cuehē gā ñayuu scuándute ya vésú Juan. <sup>2</sup>Te nasūu jēē scuándute máá yá, chi tēe cáscuáha jíin yá cúu jeē cascuándute. <sup>3</sup>Te ná ni jini Jesús jeē súcuan ni canihín de jnúhun, te ni quenda ya región Judea, te cuanuhun yā región Galilea.

<sup>4</sup>Te ichi jeē nuhún yā chi yáha región Samaria. <sup>5</sup>Te ni jinū yā iin ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. <sup>6</sup>Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájñuhun cahuxí uū cúu. <sup>7</sup>Te ni quee iin ñahan Samaria, véji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

<sup>8</sup>Te tēe cáscuáha jíin yá, chi je cuangoo de nde ñuu, cuacuaan de jeē cáji de jíin yá. <sup>9</sup>Te ñahan Samaria un ní cahān ña jíin yá:

¿Ndese cúu jeē jicán ní ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahán i jíin ñayuu Samaria. <sup>10</sup>Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin

ndé ìn cúu sãña jéé jicán na ndute nuū ní, yūcuán na te máá ní cacān ni nuū ná, te cuāha ná ndute jeē cótecu ni ní cáni sáha, áchí yá.

<sup>11</sup>Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéé táva ní ndute. Núu súcuan ¿te ndé nuū nihín ni ndute jeē cótecu na sáha? <sup>12</sup>¿Te á cújéhnú ga maá ní vēsú jíi yō Jacob, chí naún? Chi máá de ni stóo de pozo yáha nuū yō. Te yāha ní cajihí máá de ndute, jíin táca séhe de, jíin quiti ndéca de. Achí ña.

<sup>13</sup>Te ni cahān Jesús:

Táca ñayuu jeē jíhi ndute yáha, chí jichí tucu i. <sup>14</sup>Te ñayuu coho ndute jeē cuáha na nuū i, chí ma jichí cuiti gā i. Chi ndute jeē cuáha ná un, cane ini i nájnūhun ndute jeē cáne ñuhún, te sáha jeē cotecu i ní cáni, áchí yá jíin ña.

<sup>15</sup>Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiti gā ná, ni tuá jíni ñūhun quiquihin ná ndute pozo yáha, áchí ña.

<sup>16</sup>Te ni cahān Jesús jíin ña:

Cuácana ní yìi ní te quiji ní jíin de, áchí yá.

<sup>17</sup>Te ni cahān ña:

Tú yìi ná íyó.

Te ni cahān Jesús:

Ndaā cahán ni jéé tú yìi ní íyó.

<sup>18</sup>Chi je ni cuu uhūn yìi ní, te tēe ndéca ní vijna chí nasūú yìi ní cúu de. Yāha cúu jeē ni cahān ndaā ní, áchí yá.

<sup>19</sup>Te jeē súcuan ni cahān yā, te ni cahān ña:

Tátā, ìn tēe nácani jnūhun Yaā Dios cúu ní, jéni ní ná. <sup>20</sup>Tāca jíi

na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéé ñuu Jerusalén cúu nuū cánuú chiñúhún yó yā, achí ña.

<sup>21</sup>Te ni cahān Jesús jíin ña:

Nánā, candíje ní jnúhun cáhán na, chí quee quiví jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátā, chí ndíhi-ni lugar te cuu chiñúhún ní yá. <sup>22</sup>Máá ní ñayuu Samaria tu cájini ni ndé ìn cúu jeē cáchiñúhún ní. Te máá ná jijnáhan ná chí cájini na ndé ìn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. <sup>23</sup>Te je ni quee quiví jeē ñáyuu cáchiñúhún ndáā, vijna te chiñúhún ndije i Yaā cúu Tátā nde jíin ini jíin ánuá i. Chi máá Tátā cúní yā jeē súcuan chiñúhún ñáyuu yā. <sup>24</sup>Yaā Dios cúu Espiritu, te ñayuu jeē cuní i chiñúhún i ya, cánuú jéé chiñúhún ndije i ya jíin ini jíin ánuá i, áchí yá.

<sup>25</sup>Te ni cahān ñahan ún:

Jíni na jéé quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá táca jnúhun nuū yō.

<sup>26</sup>Te ni cahān Jesús:

Máá ná jeē cahán jíin ní, suu ná cúu Yaā ún.

<sup>27</sup>Te sá cahán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ìn de tu ní cájnūhún de ya núu na vé cájnūhun yá ña chí na vé ndájnūhun yá jíin ña. <sup>28</sup>Yūcuán na te ñahan un ní stóo ña quiyí ña, te cuahān ña nde ñuu. Te ni cahān ña jíin ñáyuu ún:



<sup>29</sup>Nehen na quíngoo yó te coto ró ìn tēe jeē ní cachi ndìhì tāca jēē ni sáha ri. Sanaa te máá yá cúu Cristo, jeē cándetu yó quiji, áchí ña.

<sup>30</sup>Yūcuán na te ni quendacoo i ñuu ún, te cuangoo i nuū íne Jesús. <sup>31</sup>Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáā víí, achí de.

<sup>32</sup>Te ni cahān yā jíin de:

Iyó stáā caji rī jeē tu cājini rō ndese cúu.

<sup>33</sup>Yūcuán na te tēe cáscuáha jíin yá, ni cacajnūhun jnáhan de:

¿A ní quindeca ìn ñayuu jeē ní yeji yā, chí naún? áchí de.

<sup>34</sup>Te ni cahān Jesús:

Jeē ní cachi rī jeē iyó jēē cāji rī cúu jeē cúsiñ ni rī sáha ri jniñu cúní Yaā ní tají rúhū vēji ri, jíin jēē sínu ri jniñu ún. <sup>35</sup>Te cacahān rō jeē cúmaní cuñ gā yoō te tahndē trigo. Te ruhū chi cáhán rī jíin ró: Condēhe jíjnáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chí je cáhiyo tūhva i candíje i ruhū. <sup>36</sup>Te tēe scándíje ñayuu cácuu de nájnūhun tēe cājehnde trigo, te nihin de yāhu de. Te jeē cánastútú de ñayuu cúu jeē cótecu i níí cáni andiví. Te tēe cáscuíté núu jnūhun ri, inuú-ni cusíñ ni de jíin tēe cástéén gā jnūhun ri.

<sup>37</sup>Chi ndaā cúu jnūhun jeē cahán: ìn tēe jéte, te inga tēe nástútú, áchí. <sup>38</sup>Te suu cúu jeē ní tají rí rohó jíjnáhan ró jēē scándíje ró ñayuu jeē jé ni canihin jnūhun ya ni casáha inga tēe. Chi inga tēe je ni canacani de jnūhun nuū ñáyuu, te máá ró chí nájnūhun cánastútú ró i cúu jeē scándíje ró i.

<sup>39</sup>Te cuehē ñayuu Samaria jeē cáyūcú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndìhì tāca jēē ni sáha ri. <sup>40</sup>Te jeē yúcuán cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuán úu quiví. <sup>41</sup>Te cuehē gā i ni cacandíje i ya jíin jnūhun cáhán maá yá. <sup>42</sup>Te ni cacahān i jíin ñahan ún:

Tuá niní jēē cahán maá ró te candíje ri yā, chí je ni cajini sōho ri jnūhun cáhán maá yá. Te cājini yō jeē maá yá cúu ndije Cristo, Yaā jnama ñayuu ñayiví. Achí i.

#### Jeē ní nasávāha ya sēhe tēe ndíso jniñu nuū rey

<sup>43</sup>Te nuū ni yáha uū quiví ún, te Jesús ni quenda ya Samaria, te ni quihin tucu ya ichi cuanuhun yā región Galilea. <sup>44</sup>Chi je ni cahān maá yá jeē tēe cánacani jnūhun Yaā Dios, tu cáhiyo yíñúhún ñáyuu ñuu de jíin de, te suni súcuan ni cuu jíin máá yá. <sup>45</sup>Te ná ni najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñuu Jerusalén, te ni cajito i tēcá jniñu ní sáha ya quiví ní iyo vico ún.

<sup>46</sup>Yūcuán na te ni jehēn tucu ya ñuu Caná ndañū Galilea, nuū ni sáha ya jeē ndúte ni nduu vino. Te ini ñuu Capernaum ni iyo ìn tēe cújéhnu jeē ndíso jniñu nuū rey. Te cúhú sēhe de. <sup>47</sup>Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondéhé de ya, te ni cahān ndahú de jíin yá jeē na quíhín yā

jiín de vehe de, te nasávāha ya sēhe de, chi je yajni cuu i. <sup>48</sup>Te ni cahān Jesús jiín de:

Núu tú coto ró jniñu jéhnú jeē nāa ni rō sáha, te ma candíje cuiti rō jijnáhan ró, áchí yá.

<sup>49</sup>Te tēe ndíso jniñu nuū rey, ni cahān de:

Cava vāha ni ní na quíhín yō, chi núu cucuée ní te cuu sēhe ná, áchí de.

<sup>50</sup>Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. <sup>51</sup>Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

<sup>52</sup>Te ni cajñuhún de na hora ni quejéé nduvāha i. Te ni cacahān i jiín de:

Cahiin jeē ícu ni quenda quiji i.

<sup>53</sup>Yūcuán na te máá tátá i ni sáha de cuenta jeē hora un cúu jeē ni cáhān Jesús jiín de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

<sup>54</sup>Yāha cúu vuelta uū jeē ni sáha Jesús jniñu jéhnú jeē ni stéén yā poder yā región Galilea, jeē ní najinū yā jeē ni jéhēn yā región Judea.

**Jeē ní nasávāha ya iin tēe  
cátú yuhu pila Betesda**

**5** Yūcuán na te cuahān tucu Jesús ñuu Jerusalén, chi íyó tucu vico cásáha jnáhan ñuu yā hebreo. <sup>2</sup>Te Jerusalén íyó iin pila ndute yajni yéhyí jéē naní yéhyí lanchí. Te yuhu hebreo

naní Betesda. Te nuū íne pila un íyó úhūn corredor. <sup>3</sup>Te ini tācá corredor un cācāa cuehē ñayuu cācuhū, jeē cuaá, jeē chacuá, jeē ni íjin. Te cāndetu i jeē canda ndute ún. <sup>4</sup>Chi íyó quívī jeē cúun iin ndajéhé yā ini pila un, te scānda ya ndute. Te ñayuu quívī xihna gā ini pila un ná scānda ya ndute, te nduvāha i na-ni cuehyī ndóho i. <sup>5</sup>Te yūcuán íyó iin tēe jeē ní cuu ocō xahūn unī cuiyā kuhú de. <sup>6</sup>Te ni jito Jesús jeē catú de, te ni jini yā jeē ní cuu cuehē cuiyā kuhú de. Te ni cahān yā jiín de:

¿A cúni rō nduvāha ró? áchí yá.

<sup>7</sup>Te ni cahān tēe cúhú un jíin yá:

Tu níhín na ni iin tēe squívī sāñá ini pila hora jeē cánda ndute. Chi tāca jínu jeē cuní na quívī ná, te quívī-ni inga ñayuu xihna gā. Achí de.

<sup>8</sup>Te ni cahān Jesús:

Ndocuñī te naquihin ró camilla rō te caca ró, áchí yá.

<sup>9</sup>Te tēe un ní nduvāha-ni de. Te ni naquihin de camilla de, te ni quejéé de jíca de. Te quívī ndétātu cúu quívī ún. <sup>10</sup>Yūcuán na te jnáhan de tēe hebreo un ní cacahān jiín de:

Quívī ndétātu cúu vijna. Te áchí ley jeē ma cúu condiso ró camilla rō.

<sup>11</sup>Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

<sup>12</sup>Yūcuán na te ni cacajñuhún un de:

¿Ndé tēe ni cahān jiín ró jeē náquihin ró camilla rō te caca ró?

<sup>13</sup>Te tēe ni nduvāha ún, tu jíni de ndé iin cúu jeē ní nasávāha de.

Chi cáhiin cuehē ñayuu yūcuán, te Jesús je cuahān yā. <sup>14</sup>Te cúcuéé gá te ni najnáhan Jesús jiín de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiji iin jnūndóho xeēn gā siquī rō, achí yá.

<sup>15</sup>Yūcuán na te cuahān tēe ún, te ni castūhún de nuū jnáhan de hebreo un jéé Jesús cúu jeē ní nasávāha ya de. <sup>16</sup>Te siquī jeē ní sáha Jesús jniñu yáha quivī ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya. <sup>17</sup>Te ni cahān Jesús jiín de:

Máa Tátá rī chi ní cáni te nde vijna sáha ya jniñu váha, te suni súcuan ruhū sáha ri jniñu váha.

<sup>18</sup>Te siquī jeē ni cáhān yā súcuan, te tēe hebreo un víhyá gā cácuni de cahni de ya. Chi nasūu máa iin-ni jeē tu squícu ya jeē cahán ley siquī quivī ndétátú, chi suni jeē ni cáhān yā jeē Tátá yā cúu Yaā Dios, te súcuan sáha inuú yá maá yá jiín Yaā Dios.

#### **Siquī jeē ndíso jniñu Sēhe Yaā Dios**

<sup>19</sup>Te ni cahān Jesús:

Jendaá cahán rī jiín ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jito ri sáha Tátá rī. Chi tāca jéé sáha Tátá rī, suni sáha ruhū jeē cúu ri Sēhe ya. <sup>20</sup>Chi máa Tátá rī, manī yā jiín ruhū jeē cúu ri Sēhe ya, te stéén yā nuū rī ndíhi jeē sáha ya. Te jéhnu ga jniñu stéén yā vēsú jeē ní cuu vijna, jeē naa ni rō coto ró jijnáhan ró. <sup>21</sup>Te nájnūhun jeē nastécu maá Tátá rī

ndīyi te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní maá rí. <sup>22</sup>Te máa Tátá rī, tu sándaā yā siquī ni iin ñayuu, chi ni jēhe ya jnūhun jeē sándaā maá rí siquī tāca ñáyuu, chi Sēhe ya cúu ri. <sup>23</sup>Te súcuan te coo yíñúhún ndíhi ñayuu nuū rī, nájnūhun yíñúhún i nuū Tátá rī. Te ñayuu tu íyó yíñúhún núu rī, núu súcuan te suni tu yíñúhún i nuū maá Tátá rī jeē ní tají yá ruhū vēji ri.

<sup>24</sup>Jendaá cahán rī jiín ró: Núu iin ñayuu chuhun ni i jnūhun cáhán rī, te candíje i jeē Yaā ndaā cúu Yaā ní tají rúhū vēji ri, ñayuu ún cotecu i ní cáni andiví, te ma jnahnú ndetū i. Chi ma cúu ga i nájnūhun ndīyi, chi sa suhva cotecu i ní cáni. <sup>25</sup>Jendaá cahán rī jiín ró jeē quiji quivī, te vijna je ni quejéé, jeē tāca ñáyuu cácuu nájnūhun ndīyi, cuni nahín i jnūhun cáhán ruhū, Sēhe Yaā Dios. Te ñayuu cuatáhú, chi cotecu i ní cáni. <sup>26</sup>Chi nájnūhun íyó poder maá Tátá rī jeē sáha ya jeé técu ndíhi-ni, suni súcuan ni jēhe ya poder nuū ruhū jeē sáha ri jeē cotecu ndíhi-ni. <sup>27</sup>Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe. <sup>28</sup>Ma náa ni rō cani ni rō siquī jnūhun cáhán rī. Chi quee quivī jeē tāca ndīyi cuni sōho i jnūhun cahán rī, <sup>29</sup>te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i ní cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

#### **Ndé vé cúu jeē steén jeē ní tají Yaā Dios yā**

<sup>30</sup>Tú na vé cúu sáha ri jeē maá rí. Chi nájnūhun ndácu Yaā Dios jniñu

nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji rī. <sup>31</sup>Núu ruhū cahán rī jeē cúu ri Sēhe Yaā Dios, te cachi ñayuu jeē tu jéjníñu jñuhun cáhán rī. <sup>32</sup>Te íyó inga jeē cahán jeē cúu ri Sēhe ya. Te jíní rī jeē jñuhun un jéē cahán yā, chi níhín jñiñu. <sup>33</sup>Máá ró ni catají ró tēe ni cacajñuhún de Juan. Te Juan chi ndaā ni cahán de jñuhun rī. <sup>34</sup>Te vēsú súcuan te nasūu rúhū cúu jeē jíní ñúhún jeē steén iin tēe jeē Séhe Yaā Dios cúu ri. Chi máá ró cúu jeē jíní ñúhún návāha candíje ró te cācu ró jíjñáhan ró. Jeē yúcuan ní cahán rī jeē iyó ndáá jñuhun ri jeē ní nacani Juan. <sup>35</sup>Máá Juan ni cuu de nájñuhun iin lámpara jeē cayú te cúndijin, cúu jeē ní nacani de jñuhun rī. Te máá ró, jecu-ni quivī ni canujnahan ni rō jeē ni steén de nuū rō. <sup>36</sup>Te íyó jéē steén cají gá jeē cujéhnu ri vēsú jeē ni cáhán Juan. Suu jñiñu sáha ri, jñiñu jeē ní tejñiñu Tátá rī ruhū jeē sáha ri, jñiñu un steén ndije jeē maá yá ni tají rúhū vēji rī. <sup>37</sup>Te Tátá rī jeē ní tají yá ruhū vēji rī, suni máá yá cahán nuū tútu ií jeē cujéhnu ri, vēsú tu ní cājini sōho cuiti rō jeē cahán yā, ni tu ní cājito ró yá. <sup>38</sup>Te tu ní cáchuhun ni rō jñuhun un jéē ni cáhán Tátá rī, chi tu cácandíje ró rúhū, Yaā ní tají yá vēji. <sup>39</sup>Cánanducú vii rō tāca jñuhun cáhán tutu ií, chi cājeni ni rō jeē yúcuan níhín rō jñuhun jeē cótecu rō níí cáni sáha. Te jñuhun siquī maá rí cúu jeē cahán tutu ún. <sup>40</sup>Te vēsú súcuan te tu cácuni rō

cuatáhú ró ruhū quívicoo ró ndaha ri návāha cotecu rō níí cáni.

<sup>41</sup>Tu chíhi ri cuenta jñuhun jeē cácahān ñayuu jeē cujéhnu rī. <sup>42</sup>Chi je jíní rī ndese cándāa ánuá rō jeē tu cáhīyo maní rō jíin Yaā Dios. <sup>43</sup>Ruhū vēji rī jíin jñiñu cúní Tatá rī, te tu cájetáhú ró ruhū. Te núu inga tēe quee de jíin jñiñu cúní maá de, sa tēe un yáchí cuatáhú ró de. <sup>44</sup>¿Ndese cuu candíje ró jíjñáhan ró? Chi máni cácuni rō jeē cujéhnu ró sáha jñáhan ró, te tu cánducú ró jeē cujéhnu ró sáha Yaā Dios, jeē maá iin-ni ya iyó. <sup>45</sup>Ma cáni ni rō jeē cáquin rī cuēchi siquī rō nuū Tatá rī. Chi íyó iin jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de. <sup>46</sup>Chi núu ní cácandíje ró jéē ní tee Moisés, te suni candíje ró rúhū nuú, chi jñuhun máá rí ni tee de. <sup>47</sup>Te núu tu cácandíje ró jñuhun ri jeē ní tee de, ¿te ndese candíje ró jñuhun cáhán maá rí núu súcuan? Achí yá jíin de.

### Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

**6** Yūcuán na te cuahān Jesús inga lado mar Galilea, jeē cúu mar Tiberias. <sup>2</sup>Te yōhyo cuehē ñayuu ni candiquin i ya, chi ni cajito i tācá jñiñu jéhnu jeē steén yā poder yā jeē ní nasávāha ya ñayuu cácuñu. <sup>3</sup>Te ni caa ya iin yucu, te ni cucōo ya yúcuan jíin tēe cáscuáha jíin yá. <sup>4</sup>Te je ni cuyajni vico pascua jeē cánucuhun ni jñáhan ñuu yā hebreo jeē ní cacācu i nuū ñayuu nación Egipito. <sup>5</sup>Te ni ndacoto ya,

te ni jito ya jeē véjicoo cuehē ndasí ñáyuu. Te ni cahān yā jíin Felipe:

¿Ndé nuū caaan yó jéé caji ñayuu yáha jíjnáhan i?

<sup>6</sup>Te súcuan ni cahān yā jeē jíto ndee yā de núu ndese cahān de. Chi je jíni maá yá ndese sáha ya. <sup>7</sup>Te ni cahān Felipe jíin yá:

Te ni ma cánda uū ciento denario staā, ni vēsú jeē caji i jecu jecu jíjnáhan i, áchí de.

<sup>8</sup>Yūcuán na te ni cahān Andrés, ñani Simón Pedro, inga tēe scuáha jíin yá un:

<sup>9</sup>Yāha íne iin sūchi yí jéé ndíso i uhūn staā cebada jíin úu chāca. ¿Te ndé canda cuiti ún, chi ñayuu cuehē ndasí cúu?

<sup>10</sup>Yūcuán na te ni cahān Jesús:

Cahān jíin ñayuu na cúcō i, áchí yá.

Te yūcuan cáa cuehē ite, te ni cacucō i, te nájnūhun uhūn mil tēe cúu. <sup>11</sup>Te ni quihin Jesús staā ún, te ni nacuatáhu yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñáyuu ní cacucō ún. Te suni súcuan ni sáha ya jíin cháca, te ni cayeji i nasaa cáconi maá i. <sup>12</sup>Te nuū ní candutú chíji i, te ni cahān yā jíin tēe cáscuáha ún:

Nastútú ró tācá pedazo jeē ni ndóo, návāha tu stívi cuiti yō.

<sup>13</sup>Te ni canastútú de, te ni chitú úxi uū jica pedazo jeē ni ndóo siquī ndihúhún staā cebada un jeē tuá ni ndíhi caji ñayuu. <sup>14</sup>Te ñayuu un ní cajito i jniñu jéhu ni sáha Jesús jeē ní stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíji ini ñayivi jéé nácani jnūhun Yaā Dios. Achí i.

<sup>15</sup>Te ni jini Jesús jeē cáconi i sáfuerza i ya jeē cuu ya rey i núu. Te ni cujiyo tucu máá iin-ni ya, ni caa ya cuahān yā nuū sucún gá yucu.

### Jeē ní jica jéhe yá nuū mar

(Mt. 14.22-27; Mr. 6.45-52)

<sup>16</sup>Te nuū cuácuaa, te tēe cáscuáha jíin yá ni nanuu de cuango de nde mar. <sup>17</sup>Te ni ndívicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. <sup>18</sup>Yūcuán na te ni jequíhi iin tachí níhin, te sáha jeē ndóna ndute mar un. <sup>19</sup>Te jeē ní cuu nájnūhun uhūn chí íñu kilómetro cájica de jíin barco, te ni cajito de jeē jica Jesús nuū mar, te ni cuyajni ya vēji ya nuū barco. Te ni cayūhú de. <sup>20</sup>Te máá yá ni cahān yā jíin de:

Máá rí cúu. Ma yūhu ró jíjnáhan ró.

<sup>21</sup>Te ni cacusi i ni de jeē na quívi ya ini barco. Te ni sáha ya jeē yachí-ni ni jinūcoo-ni de ñuhun íchi núu cuango de ún.

### Jeē cánanducú ñayuu Jesús

<sup>22</sup>Te inga quiví ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuango de jíin máñuhún-ni barco ni íne yūcuán, jíin jéé tu ní quívi Jesús quihín yā jíin de jíjnáhan de. <sup>23</sup>Te sava ga barco jeē véjicoo ichi ñúu Tiberias, ni quecoo yajni lugar nuū ní cayeji i staā jeē ní nacuatáhu máá Jítoho yō jehē. <sup>24</sup>Te jeē ní cajito ñayuu un jéé tuá Jesús íne ya yūcuán, ni tēe cáscuáha jíin yá, te ni quívicoo i tāca barco

un, te cuangoo i ñuu Capernaum cuananducú i ya.

**Jesús cúu staā jeē cótecu yō ní cání**

<sup>25</sup>Te nuū ni jínūcoo i nde inga lado mar, te ni nanihīn jnáhan i jín Jesús. Te ni cacajñuhún i ya:

Maestro, ¿na hora ni quee ni yáha?

<sup>26</sup>Te ni cahān Jesús:

Jendaá cahán rī jín ró jeē cánanducú ró ruhū siquī jeē ní cayeji ró nde ni candutú chíji ró, te nasūu siquī jeē ní cajito ró táca jniñu jéhu jeē steén rī poder rī.

<sup>27</sup>Ma condihvī ni ró maá siquī jeē caji ró jeē yachī nataxīn, chí sa suhva condihvī ni ró siquī jeē nihín ró jeē cótecu ró ní cání sáha. Te máá rí, Yaā ní nduu tēe, cuāha ri nájnūhun staā jeē cótecu ró ní cání sáha. Chí Tátá rī Yaā Dios ni jeni ya ruhū jeē sáha ri súcuan. Achí yá jín i.

<sup>28</sup>Yūcuán na te ni cacajñuhún i ya:

¿Ndese sáha ná návāha squícu ná jniñu cúní Yaā Dios?

<sup>29</sup>Te ni cahān Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

<sup>30</sup>Yūcuán na te ni cacahān i:

Núu súcuan ¿te na jniñu jéhu sáha ní coto ná jínáhan ná te candíje ná jéē ní tají yá nihín? ¿Na jniñu cúu jeē sáha ní? <sup>31</sup>Chí tāca jí yō jenahán ni cayeji de maná jeē ní cuun ichi ándiví ndé nuū ñūhun téhé, nájnūhun yósó núu tútu: Yaā Dios ni jēhe ya staā ni cuun ichi ándiví, ni cayeji i, áchí tutu. Achí i jín yá.

<sup>32</sup>Te ni cahān Jesús:

Jendaá cahán rī jín ró: Nasūu Moisés ni jēhe staā un núu de jínáhan de jeē ní cuun ichi ándiví, chí máá Tátá rī ni jēhe. Te máá yá jēhe staā ándiví jéē cótecu ró ní cání sáha. <sup>33</sup>Chí staā jēhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cotecu i ní cání ándiví. Achí yá.

<sup>34</sup>Te ni cacahān i jín yá:

Níní cuāha ni stāā ún caji na núu súcuan.

<sup>35</sup>Te ni cahān Jesús:

Máá rí cúu máá stāā jeē cótecu ró ní cání sáha. Ndé vé quívī ndaha ri, ma cúu cuítī gā sōco. Te ndé vé candíje ruhū, ma jichí cuítī gā. <sup>36</sup>Te nájnūhun je ni cahān rī jín ró, tu cáccandíje ró rúhū, vēsú ni cajito ró núu rī. <sup>37</sup>Tāca ñáyuu jeē sáha Tátá rī jeē candíje i ruhū, máá i quívicoo ndaha ri. Te jétáhú rí tāca jéē cuní quívī ndaha ri, chí ma squéhichí cuítī rī quihīn. <sup>38</sup>Chí ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jéē sáha ri jeē cuní máá rí. <sup>39</sup>Te jniñu jeē cuní Tátá rī, Yaā ní tají rúhū, cúu jeē ma scuíta ri ni ñayuu ni jēhe ya nuū rī, chí condito rī i te nastécu rī i quívī jínu ñayiví. <sup>40</sup>Te Yaā ní tají rúhū, cuní yá jeē tāca ñáyuu jeē nihín i jñūhun ruhū, Sēhe Yaā Dios, te candíje i ruhū, cotecu i ní cání ándiví. Chí nastécu rī i quívī jínu ñayiví. Achí yá.

<sup>41</sup>Yūcuán na te ni caquejéé jnáhan ñuu yā hebreo cácahān de siquī yā, chí ni cahān yā jeē maá yá cúu staā ní quiji ichi ándiví. <sup>42</sup>Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de.

¿Te ndese cúu jeē cahán de jeē ni quíji de ichi ándiví núu súcuan?

<sup>43</sup>Te ni cahán Jesús jíin de:

Ma cahán rō siquī rī jijnáhan rō. <sup>44</sup>Ni iin ñayuu ma cúu quívi i ndaha ri núu ma sáha Tátá rī jeē cúu ni i quívi i, chi máá yá ni tají rúhū vēji ri. Te nastécu rī i quívi jínu ñayívi. <sup>45</sup>Te suhva yósó núu tútu ni catee tēe ni canacani jnūhun Yaā Dios: Tācá i chi steén Yaā Dios nuū i, áchí. Núu súcuan te tāca ñayuu jíni sōho jnūhun cáhán Tátá rī, te jétáhú i jeē steén yā nuū i, ñayuu ún chi quívicoo i ndaha ri.

<sup>46</sup>Te tu ní jíto ni iin ñayuu nuū maá Tátá rī. Chi máñúhún-ni ruhū ni jito ri nuū yā, chi nde nuū maá yá vēji ri. <sup>47</sup>Jendaá cahán rī jíin ró jijnáhan ró jéē ñayuu jeē candíje i jeē jnáma ri i, máá i cotecu i ní cáni. <sup>48</sup>Máá rí cúu staā jeē cótecu rō ní cáni sáha. <sup>49</sup>Tāca jíi rō jenahán, ni cayejí de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ní cáni andiví. <sup>50</sup>Te staā jeē cahán rī jeē vēji ichi ándiví, chi na-ni ñayuu caji, te cotecu i ní cáni andiví. <sup>51</sup>Te suu máá rí cúu staā un jéē ní quíji ichi ándiví jéē sáha jeē cótecu rō ní cáni. Te ñayuu jeē caji staā yáha, cotecu i ní cáni andiví. Te staā jeē cuáha ri un cúu yiqui cúñu rī, te cuáha ri návaha ñayuu ñayívi cotecu i ní cáni andiví. Achí yá.

<sup>52</sup>Yūcuán na te jnáhan ñuu yā hebreo ni cacahán de jíin táca jnáhan de:

¿Ndese cuu cuáha tēe yáha yiqui cúñu de caji yō? achí de.

<sup>53</sup>Te ni cahán Jesús jíin de:

Jendaá cahán rī jíin ró: Núu tú candíje ró jéē yiqui cúñu ruhū, Yaā

ní nduu tēe, cúu nájnūhun staā, te níñi rī cúu nájnūhun ndute, núu súcuan te ma cótecu rō ní cáni andiví. <sup>54</sup>Chi ñayuu cácandíje jeē yiqui cúñu rī cúu nájnūhun staā te níñi rī cúu nájnūhun ndute, máá i cotecu i ní cáni. Te nastécu rī i quívi jínu ñayívi. <sup>55</sup>Chi yiqui cúñu rī jíin níñi rī cúu ndije jeē sáha jeē cótecu i ní cáni. <sup>56</sup>Te ñayuu cácandíje jeē yiqui cúñu rī jíin níñi rī cúu nájnūhun staā jíin ndute jeē cótecu i ní cáni sáha, máá i níni ndúú i jíin rí, te ndúú rí jíin i. <sup>57</sup>Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñayuu cácandíje jeē cúu ri nájnūhun staā i ndute i, suni súcuan cotecu i ní cáni sáha ri. <sup>58</sup>Máá rí cúu staā ní quíji ichi ándiví. Te staā jeē cahán rī tu cúu nájnūhun staā maná jeē ní cayejí tāca jíi rō jenahán, chi tu ní sáha jeē cótecu de ní cáni. Te staā jeē cahán rī, chi ñayuu caji, cotecu i ní cáni sáha, áchí yá.

<sup>59</sup>Tāca jnúhun yáha ní steén Jesús nuū ñayuu ní candutútú ini vehe ii sinagoga ñuu Capernaum.

#### Jnūhun cotecu yō ní cáni

<sup>60</sup>Te cuehē ñayuu cascuáha jíin yá, ni cajini sōho i jnūhun yáha jéē ni stéén yā. Te ni cacahán maá i:

Yōhyo yíi jnúhun cáhán yā yāhá. ¿Ndese cuu cuatáhú yō?

<sup>61</sup>Te ni jini Jesús jeē cacahán i jeē yíi cúu jnūhun yáhá, te ni cahán yā jíin i:

¿A yíi sáha jnūhun yáha jíin ró jijnáhan ró? <sup>62</sup>¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee



rī xihna ñúhún? <sup>63</sup>Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuiti súcuan. Te táca jnúhun ni cahān rī jín ró cúu jeē quéndōo vāha ánuá rō, te cotecu rō níf cáni sáha. <sup>64</sup>Te sava ró chi tu cácanđije ró. Achí yá.

Chi nde xihna ñúhún je jíní Jesús ndé-ni cúu ñayuu jeē ma cándije, jín ndé ñin de cúu jeē nastúu de ya. <sup>65</sup>Te ni cahān gā yā:

Jeē yúcuān ní cahān rī jín ró jeē ma cúu quivī ni ñin ñayuu ndaha ri, te núu tu sáha Tátá rī jeē cúu ni i quivī i, áchí yá.

<sup>66</sup>Te nde quivī ún te cuehē ñayuu cascuáha jín yá, ni castóo i ya, te tuá ni cájica i jín yá. <sup>67</sup>Yúcuān na te ni cahān yā jín máá ndihúxí uū tēe cáscuáha jín yá:

¿A suni cácuñi máá ró quingoo ró, chí naún?

<sup>68</sup>Te ni cahān Simón Pedro:

¿Nde núu gā quingoo ná? Chi máá ní cúu jeē nácani jnúhun jeē cótecu na níf cáni sáha. <sup>69</sup>Te ni cacandije ná te cájini na jéé máá ní cúu Cristo, Sēhe Yaā Dios, Yaā técu, achí de.

<sup>70</sup>Te ni cahān Jesús:

Te vēsú ni nacāji ri ndihúxí uū rō, te íyó ñin ró jeē ní quivī jexeén ini. Achí yá.

<sup>71</sup>Te súcuan ni cahān yā siquī Judas Iscariote, sēhe Simón. Chi máá de nastúu de ya, vēsú ñin jnáhan jeē uxí uū tēe cáscuáha jín yá cúu de.

### Jeē tu ní cácanđije ñani Jesús

**7** Yúcuān na te jíca cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu

yúcuān, cácuñi de cahni de ya. <sup>2</sup>Te cuacuyajni vico jeē casáha ñayuu yā hebreo vehe ramádá, cáyūcú i chíji. <sup>3</sup>Te ñani yā ni cacahān de jín yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuān jéé cácanđije de rōhó, suni coto de jniñu jéhu sáha ró. <sup>4</sup>Chi núu cúní ñin tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéhu, vāha ga na sáha ró jéé cúni ndivii ñayuu.

<sup>5</sup>Súcuan ni cacahān ñani yā jín yá, chi ni máá de tu cácanđije de ya.

<sup>6</sup>Yúcuān na te ni cahān Jesús:

Ná tu quee máá quivī jeē quihín rī. Te máá ró jijnáhan ró chi na-ni quivī-ni te cuu quingoo ró. <sup>7</sup>Chi ma quití ni ñayuu ñayivī núu rō, te máá rí chí quití ni i jíto i ruhū, chí cáhān rī jeē jíní rī jeē máni jniñu néé casáha i. <sup>8</sup>Cuángoo máá ró vico ún. Te máá rí chí ma quihín rī vijna, chí ná tu quee máá quivī cánuú quihín rī. Achí yá.

<sup>9</sup>Súcuan ni cahān yā jnúhun yáha jín de, te ni quendōo ya Galilea.

### Jeē ni jéhēn Jesús vico vehe ramádá

<sup>10</sup>Te nuū ni yáha ñani yā cuangoo de vico ún, te sáa te suni cuahān máá yá. Te tú cuahān ndijin yā, chí tu ní stéen yā máá yá. <sup>11</sup>Te jnáhan ñuu yā hebreo cánanducú i ya nuū víco ún, te cácahān i:

¿Nde nuū íne tēe ún? áchí i.

<sup>12</sup>Te yōhyo ni cacahān ñayuu jeē siquí yā, chí sava i cácahān: Tēe vāha cúu de. Te sava ga i cácahān: Tuú chí stáhú de ñayuu.

<sup>13</sup>Te yuhu-ni ni cacahān i jnúhun ya, chí cáyūhú i jeē quití ni jnáhan i tēe hebreo.



<sup>14</sup>Te jeē ní cuu sava vico, te ni quee Jesús, ni quiví ya templo cáhnu, te ni quejéé yá steén yā jnūhun. <sup>15</sup>Te ni canaa ni jnáhan ñuu yā hebreo cájini sōho i, te ni cacahān i:

¿Ndesa jíní tēe yáha cuéhē jnūhun ndíhí, chí tu ní jíca de escuela? áhí i.

<sup>16</sup>Yūcuán na te ni cahān Jesús:

Jnūhun stéén rī chí nasūu jnúhun máá rí cúu, chí jnūhun jeē ni jéhe máá Yaā ní tají rúhū cúu. <sup>17</sup>Núu ñin ñayuu cumí i sáha i jniñu cúní Yaā Dios, ñayuu ún chí jecūhun ni i núu nde nuū Yaā Dios vēji jnūhun stéén rī, chí jnúhun jeē jéni ni maá-ni rí cúu. <sup>18</sup>Tēe cáhán jnūhun jéni ni maá de, tēe un ndúcú de jeē na sájéhnu ñayuu de. Te núu ñin tēe ndúcú de jeē sajéhnu de Yaā ní tají de, tēe un cúu tēe ndaā, te tú na jnūhun stáhú íyó jíin de.

<sup>19</sup>¿A násūu jéē ni jéhe Moisés ley yā nuū rō jeē squícu ró? Te ni ñin ró tu cásquícu. Chí sa jeē cáconi rō cahni rō ruhū, ¿te najehē cúu? Achí yá.

<sup>20</sup>Te ni cacahān ñayuu cuehē ún: Tachí ndóho ró. ¿Ndeé ñin cúní cahni rohó?

<sup>21</sup>Te ni cahān Jesús:

Ni nasávāha rí ñin tēe quiví ndétátú, te ndivíi rō ni canaa ni rō ni cajito ró jéē quiví ndétátú ni sáha rí jniñu ún. <sup>22</sup>Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yíí núu uná quiví jeē ní cacu i, vēsú quiví ndétātu cúu. (Te nasūu máá Moisés ní jéquin ley un, chí je ni iyo nuū tāca jíí de.) <sup>23</sup>Núu sūcuan te núu cásáha ró circuncidar vēsú

quiví ndétātu cúu, návāha squícu ró ley Moisés, ¿te najehē cáquití ni rō jeē ní nasávāha ndihí rí ñin tēe quiví ndétátú? <sup>24</sup>Ma yachí cani ni rō jeē cuéchi cúu jeē sáha rí. Chí sa cani vāha ni rō siquí tāca jniñu vāha. Achí yá.

**Jeē ní cachi Jesús ndé nuū vēji ya**

<sup>25</sup>Yūcuán na te sava ñayuu ñuu Jerusalén ni cacajñūhun jnáhan i:

¿A násūu tēe yáha cúu jeē cánanducú tēe cácujeñnu jeē cáhni de, chí naún?

<sup>26</sup>Te yāha cáhán ndijin de nuū chítú, te tú na jnūhun cacahān jíin de. ¿A sanaa te ni cacundaā ni tēe cácujeñnu jeē tēe yáha cúu Cristo jeē achí tutu jeē quiji, chí naún? <sup>27</sup>Te tuú chí je cájini yō nuū vēji tēe yáha. Te jeē quíji Cristo, chí ni ñin yó má cúní ndé chí quíji ya. Achí i.

<sup>28</sup>Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji rí. Te vēsú sūcuan te máá Yaā ndaā cúu jeē ní tají rúhū vēji rí, te tú vēji rí jeē cúní máá rí. Te tu cájini rō ndese Yaā cúu ya. <sup>29</sup>Te máá rí chí jíin rí yā, chí nde nuū máá yá vēji rí, te máá yá ni tají rúhū, achí yá.

<sup>30</sup>Yūcuán na te ni canducú de jniñ de ya. Te ni ñin de tu ní cúu jniñ de ya, chí ná tu quee máá quiví jeē jniñ de ya. <sup>31</sup>Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jéē quiji? Chí cuehē ndasí jniñu jéhnu sáha ya jeē steén yā poder yā. Achí i.

**Jeē ní catajé de policía  
jeē jniñ de Jesús**

<sup>32</sup>Te ni cajini tēe fariseo jeē sūcuan cacahān ñayuu jnūhun ya.

Te máá de jíin sūtū cácujéhnu, ni catají de policía cándito templo jeé jnái de ya. <sup>33</sup>Te ni cahān Jesús:

Jecu na quivī condee ri jíin ró jijnáhan ró. Yūcuán na te nuhun ri nuū Yaā ní tají rúhū vēji ri. <sup>34</sup>Te nanducú ró ruhū, te ma nánihīn rō ruhū. Chi ma cúu jinūcoo ró núu cóndee ri. Achí yá.

<sup>35</sup>Yūcuán na te máá tée un ní cacajnūhun jnáhan de:

¿Te ndé nuū quihín tēe yáha jeé ma nánihīn yō de? ¿A quihín de nuū jnáhan yó hebreo jeé ní cajitē núu cáyūcu ndé nación Grecia? ¿Te á stéén de jnūhun nuū ñáyuu Grecia, chí naún? <sup>36</sup>¿Te na jnūhun cúu jeé ni cáhān de jíin yó jeé nanducú yó de te ma nánihīn yō de, chi ma cúu jinūcoo yó núu cóndee de? Achí tée un jijnáhan de.

**Siquī ndute jeé cótecu yō ní cáni sáha**

<sup>37</sup>Te quivī sándihí vico ún te cúu vico cáhnu ga. Te quivī un ní ndocuīñī Jesús, te ni cahān jee ya:

Núu ndé ñáyuu jnáa ndasí i tāca jéé váha jeé sáha ri jehē i, nájñūhun jeé jichí i ndute, núu súcuan te na quívi i ndaha ri te coho i ndute, cúu jeé nihín i jeé váha ún. <sup>38</sup>Te ñáyuu jeé candíje jeé jnáma ri i, chi ini anuá i condee Espírītu Santo, te cuu ya nájñūhun yūte cáne ñuhún jeé sáha ya jeé cótecu i ní cáni, nájñūhun cáhān tutu iī. Achí yá.

<sup>39</sup>Te súcuan ni cahān yā jeé ñáyuu candíje jeé jnáma ya i, nihīn i Espírītu Santo. Chi ná tu quee Espírītu ún, chi ná tu ndaa Jesús quínuhun yā nuū ndujéhnu ya.

**Jeé ní cacusín ñáyuu siquī yā**

<sup>40</sup>Te sava ñáyuu cuehē ún, ná ni cajini sōho i jnūhun yáha, te ni cacahān i:

Jendaá jeé tée yáha cúu jeé achí tutu jeé quiji de nacani de jnūhun Yaā Dios, achí i.

<sup>41</sup>Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasúu Galilea quiji Cristo.

<sup>42</sup>Chi cáhān tutu iī jeé ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

<sup>43</sup>Te súcuan te ni cacusín ñáyuu jeé siquī yā. <sup>44</sup>Te sava i cácuni i jni i ya, te ni iin i tu ní jnái i ya.

**Jeé tu ní cácandíje tēe cácujéhnu**

<sup>45</sup>Yūcuán na te policía cándito templo tu ní cájni de Jesús, te cuanungoo de nuū tāca tée fariseo jíin núu sutú cácujéhnu. Te tēe ún ni cacajnūhún de policía:

¿Najehē tu ní quécoo ró jíin de? áhí.

<sup>46</sup>Te ni cacahān policía un:

Tú cuiti ni iin tēe cáhān vāha ndasí nájñūhun cáhān tēe yúcuan, áhí.

<sup>47</sup>Te ni cacahān tēe fariseo:

¿Te á suni nde máá ró jijnáhan ró ní stáhú de naún? <sup>48</sup>Ni iin jnáhan ruhū tēe cácujéhnu jíin tée fariseo, tu cácandíje ri jnūhun cáhān tēe ún, ¿te naun cácandíje máá ró? <sup>49</sup>Te ñáyuu cuehē yāhá jéé tu cájecūhun ni i ley Moisés, chí jnahnū ndetū i jeé cácandíje i tēe ún, áhí de jijnáhan de.

<sup>50</sup>Te ni cahān Nicodemo, tēe ni jéhēn nuū yā iin jecuāá, te suni iin tēe fariseo cúu de:

<sup>51</sup>Cáhān ley yō jeé ma cúu tee yó cuéchi siquī iin tēe, te núu tú xihna

gā cuni sōho yó ndese cáhán de, návāha cucáhnū ni yō na cuēchi ni sáha de. Achí de.

<sup>52</sup>Te ni cacahān jíin de:

Te rōhó, ¿á suni nde Galilea vēji ró jēē cahán rō jehē tēē ún? Nanducú váha ró núū tútu íi te cuni rō jeē ndé Galilea tu quénda cuíti ni íin tēē nácani jnūhun Yaā Dios. Achí jíin de. <sup>53</sup>Te cuanungoo de ná vehe ná vehe de.

### Jnūhun ñahan ní casíquí ndéē jnáhan

**8** Te ni caa Jesús cuahān yā yucu Olivos. <sup>2</sup>Te jeē cuácundijin inga quiví, te ni ndee tucu ya templo. Te ndíhi ñayuu ni quecoo i nuū yā. Te ni cucōo ya, te ni steén yā jnūhun nuū i. <sup>3</sup>Yūcuán na te tēē cástéén tutu ley Yaā Dios jíin tēē grupo fariseo, ni quecoo de jíin íin ñahan jeē ní canihīn de ña jeē casíquí ndéē ña. Te ni cajeni de ña mēhñú. <sup>4</sup>Te ni cacahān de jíin yá:

Maestro, ni canihīn ná ñahan yáha jēē casíquí ndéē ña. <sup>5</sup>Te ley Moisés ndácu jniñū nuū yō jeē cuáha yó yúū xiní ñahan cásáha súcuan návāha cuu ña. Te máá ní, ¿ndese cáhán ni?

<sup>6</sup>Te súcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi ya, te ni tee ya nuū ñūhun jíin xíní ndáha ya. <sup>7</sup>Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé íin máá ró tú na cuēchi ró, te xīhna gā maá ró cuáha yuū xiní ña núu súcuan, achí yá.

<sup>8</sup>Te ni jīta ndeyi tucu ya, te ni tee tucu ya nuū ñūhun. <sup>9</sup>Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná íin ná íin de ni quendacoo de cuahān de, xīhna gā tēē jéhnū ga te nde nuū ní ndíhi na. Te ni ndōo máá íin na Jesús jíin ñahan índichi mēhñú un. <sup>10</sup>Te ni ndonehen tucu ya maá yá, te tuá ni íin tēē un ní jīto ya, chi máá na ñahan ún. Te ni cahān yā jíin ña:

¿Ndé chi cuángoo tēē cájequin cuēchi siquī rō? ¿A tú ni íin de ní ndóna cahān gā cuēchi siquī rō?

<sup>11</sup>Te ni cahān ña:

Tú ni íin de, achí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, achí yá.

### Jesús cúu máá luz jeē steén ini anuá ñayuu

<sup>12</sup>Te inga jíinu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i níí cáni.

<sup>13</sup>Yūcuán na te ni cacahān tēē fariseo jíin yá:

Róhó chi cáhán rō jnūhun jehē maá ró, te tu jéjnīñū jnūhun cáhán rō.

<sup>14</sup>Te ni cahān Jesús jíin de jíjnáhan de:

Vēsú cáhán rī jehē maá rí, te íyó ndáā jnūhun cáhán rī. Chi jíin rí

ndé nuū véji ri jíin ndé nuū quihín rī. Te róhó tu cájini rō ndé nuū véji ri ni ndé nuū quihín rī. <sup>15</sup>Máá ró chi cuenta ñayuu ñayīvi cásandaā rō siquī jnūhun cáhán rī. Te ruhū chi tu sándaā mañúhún rí siquī ni ñin ñayuu. <sup>16</sup>Te núu sándaā rī siquī i, te ndaā sáha ri, chi tu sáha mañúhún rí, chi sándaā rī nde jíin máá Tátá rī, Yaā ní tají rúhū véji ri. <sup>17</sup>Te yósó núu tútu ley cánevāha ró jéē núu inuú cácahān uū testigo, te jíini ñúhún cuatáhú ró jeē cácahān, chi íyó ndāā jnūhun ún. <sup>18</sup>Núu súcuan te ruhū cúu ñin jeē cáhán ndaā rī jehē rī. Te inga jeē cáhán ndaā jehē rī cúu máá Tátá rī, Yaā ní tají rúhū. Achí yá.

<sup>19</sup>Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tatá rī nuú.

<sup>20</sup>Tāca jnūhun yáha ní cahān Jesús jeē steén yā ini templo nuū cáyūcu yéjnū jeē cásocō i xūhún. Te tú ni ñin de ní jnī de ya, chi ná tu quee maá quívī jeē jnī de ya.

**Jeē ni cáhān yā jeē ma cúu  
jinūcoo de nuū cóndee yā**

<sup>21</sup>Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró siquī rō quívī cúu rō. Te jeē yúcuan má cúu jinūcoo ró núu quihín rī, achí yá.

<sup>22</sup>Yūcuán na te tēe hebreo un ní cacahān maá de:

¿A cahni tēe yáha máá de, te jeē yúcuan cáhán de jeē ma cúu jinūcoo yó núu quihín de, chí naún? Achí de.

<sup>23</sup>Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andívī véji ri. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu ri. <sup>24</sup>Jeē yúcuan ní cahān rī jeē quendōo cuēchi ró siquī rō quívī cúu rō. Chi núu ma candíje ró jéē maá rí cúu Cristo, te quendōo nahín cuēchi ró siquī rō quívī cúu rō. Achí yá.

<sup>25</sup>Te ni cacajñuhún de ya:

Núu súcuan ¿te ndé ñin cúu ró?

Te ni cahān yā:

Je ni cachi ri nuū rō nde xihna ñúhún ndé ñin cúu ri. <sup>26</sup>Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chi ini ñayīvi yáha cáhán rī maá-ni jnūhun jeē ní jini ri ni cahān Yaā ní tají rúhū véji ri. Te máni jnūhun ndaā cahán yā. Achí yá.

<sup>27</sup>Te tu ní cájecūhun ni de jeē cahán yā jnūhun Tátá yā andívī jíin de. <sup>28</sup>Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu ri. Te cuni rō jeē tú na vé sáha ri jeē maá rí, chi cáhán rī maá-ni jnūhun ni steén Tatá rī nuū rī. <sup>29</sup>Chi máá Tátá rī, Yaā ní tají rúhū, ndeé yá jíin rí. Te tu stóo mañúhún yá ruhū, chi níni sáha ri jniñu jeē núnjahan ni maá yá. Achí yá.

<sup>30</sup>Te jeē ni cáhān yā jnūhun yáha, te cuehē ñayuu ni cacandíje i ya.

**Siquī ndé-ni cúu sēhe Yaā  
Dios jíin sēhe jexeén**

<sup>31</sup>Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi ñihin ró jíin jnūhun steén rī nuū rō, te cuu ndíje ró

ñáyuu scuáha jíin rí. <sup>32</sup>Te jecūhun ni rō jñūhun ndaā, te jñūhun ndaā un sáha jeē nduu libre rō nuū jeē yíhi ró ndaha.

<sup>33</sup>Te ni cacahān i jíin yá:

Sēhe yucūn Abraham cácuu ri, te tu cáyihí cuítí rī ndaha ni ñin. ¿Te ndese cúu jeē cahán rō jeē nduu libre rī núu súcuan?

<sup>34</sup>Te ni cahān Jesús:

Jendaá cahán rī jíin ró jeē tāca ñáyuu casáha cuēchi, tu íyó libre i, chi yíhi i chíjī cuēchi jeē jejnínū cāhá i nuū. <sup>35</sup>Te ñayuu jejnínū cāhá, chi tu cúu i ñin jnáhan ñayuu vehe nuū jejnínū i. Te ñin sēhe chi sa suhva cúu ndije i jnáhan ñayuu vehe ún. <sup>36</sup>Núu súcuan te máá rí jeē cúu Sēhe Yaā Dios, núu sáha ri jeē tuá cuajníñū cāhá ró nuū cuéchi, núu súcuan te nduu libre ndije ró jíjnáhan ró, te cuu ró sēhe ya. <sup>37</sup>Te jíin rī jeē sēhe yucūn Abraham cácuu ró, te vēsú súcuan te cácuni rō cahni rō ruhū, chi tu cájetáhú ró jñūhun cáhán rī. <sup>38</sup>Ruhū chi cáhán rī jñūhun jeē ni stéén Tatá rī nuū rī. Te máá ró chi casáha ró jniñū jeē ni cahān tatá máá ró jíjnáhan ró. Achí yá.

<sup>39</sup>Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájnūhun ni candíje Abraham návāha cuu ndije ró yúcūn de, yūcuán na te jniñū vāha ni sáha de suni sáha máá ró nuú. <sup>40</sup>Te vijna chi cácuni rō cahni rō ruhū, vēsú ni cahān ri jíin ró tāca jñūhun ndaā ni steén Tatá rī nuū rī. Te Abraham chi tu ní sáha cuítí de súcuan. <sup>41</sup>Máá ró chi inuú casáha ró jíin tátá máá ró. Achí yá jíin i.

Yūcuán na te ni cacahān i:

Máá rí chi tu cácuu ri sēhe ndáhú jéé tu tátá. Chi íyó ñin-ni tátá rī, te Yaā Dios cúu ya.

<sup>42</sup>Te ni cahān Jesús:

Núu Yaā Dios cúu ndije tátá rō, te coo maní rō jíin rí nuú. Chi nde nuū Yaā Dios ni quenda ri vēji ri. Te tú vēji ri jeē cuní maá rí, chi máá yá ni tají rúhū. <sup>43</sup>¿Te najehē tu cájecūhun ni rō jñūhun cáhán rī núu súcuan? Suu siquī jeē tu cácuni rō chusóhó ró jñūhun nácani ri. <sup>44</sup>Máá ró jíjnáhan ró chi tátá rō cúu jexeén. Te cácuni rō sáha ró máá jéé cuní tátá rō ún. Máá jéxeén ni jehni ndíyī nde jeē xíhna ñúhún. Te tu ní ñin cuítí jíin jñūhun ndaā, te tú cuítí na jñūhun ndaā cahán. Te jeē cahán jexeén jñūhun stáhú cúu jeē súcuan cáa máá. Chi máá un cúu jeē ndíso jñūhun stáhú, te máá un cúu jeē ní squéjéé ndíhi jñūhun stáhú. <sup>45</sup>Te ruhū chi cáhán rī jñūhun ndaā, te jeē yúcuan cúu jeē tu cácandíje ró rúhū. <sup>46</sup>Te ni ñin ró ma nihín rō cuéchi siquī rī, chi tú cuítí na cuéchi ri. Te máni jñūhun ndaā cahán rī, ¿te naun tu cácandíje ró rúhū? <sup>47</sup>Ñayuu cácuu sēhe Yaā Dios, chi cáchusóhó i jñūhun Yaā Dios. Te nasūu sēhe Yaā Dios cácuu ró, te jeē yúcuan tu cácuni rō chusóhó ró. Achí yá jíin de.

**Iyó Jesús nde ná tu coo Abraham**

<sup>48</sup>Yūcuán na te ni cacahān jnáhan ñuu yā hebreo un:

Ndaā cacahān rī jeē canéé ró nájnūhun ñayuu Samaria, te ñúhun tachī ini rō.

<sup>49</sup>Te ni cahān Jesús:

Tu ñúhun tachī ini rī, chi yíñúhún rí jíin Tátá rī. Te máá ró jíjnáhan

ró chi tu cáhiyo yáñúhún ró jíin rí.  
<sup>50</sup> Máá rí tu ndúcú rí jeē cujéhnú  
 ri. Iyó iin jeē sáha jeē cujéhnú  
 ri, te máá yá sándaá siquī jnúhun  
 cácahān rō. <sup>51</sup> Jendaá cahán rī jíin  
 ró, núu ndé ñáyuu squícu jnúhun  
 cáhán rī, ma cúu cuíti i. Achí yá.

<sup>52</sup> Te tēe hebreo un tu ní  
 cájécūhun ni de, te ni cacahān de:

Vijna te ni cacucáhnú ni rī jeē  
 ñúhun ndije tachī ini rō. Chi  
 Abraham jíin táca tēe ni canacani  
 jnúhun Yaā Dios nde jenahán, ni  
 cajihī de. Te rōhó cáhán rō, núu ndé  
 vé squícu jnúhun cáhán rō, te ma  
 cúu cuíti i, áchí ró. <sup>53</sup> ¿Te chí jéhnú  
 ga rō vēsú jíi yō Abraham naún?  
 Chi ni jihī de, te suni ni cajihī táca  
 tēe ni canacani jnúhun ya. ¿Te ndé  
 iin ga sáha ró máá ró núu súcuan?  
 Achí de.

<sup>54</sup> Te ni cahān Jesús:

Núu ruhū sajeéhnú ri maá rí, te  
 tu níhn jniñú. Máá Tátá rī cúu jeē  
 sajeéhnú ruhū. Te cácahān rō jeē  
 maá yá cúu Yaā Dios maá ró. <sup>55</sup> Te  
 vēsú súcuan te tu cájini rō ndese  
 Yaā cúu ya. Te ruhū chi jíin rī yā,  
 te núu cahān rī jeē tu jíin rī yā, te  
 cuu ri tēe stáhú nájnūhun máá ró  
 jijnáhan ró. Te tuú chi jíin ndije ri  
 yā, te squícu ri jnúhun cáhán yā.  
<sup>56</sup> Te jíi rō Abraham ni cusīi ni de  
 jeē coto de quivī quēē rī. Te je ni  
 jito de, te ni jito rī jeē ní cusīi ndasí  
 ni de. Achí yá.

<sup>57</sup> Yūcuán na te ni cacahān tēe  
 hebreo un jíin yá:

Ni ná tu coo ró uū xico uxī cuiyā,  
 ¿te ndese cúu jeē cahán rō jeē ní  
 jito ró núu Abraham? achí de.

<sup>58</sup> Te ni cahān Jesús:

Jendaá cahán rī jíin ró jeē nde ná  
 tu cacu Abraham te je iyó rí, achí  
 yá.

<sup>59</sup> Yūcuán na te ni caquihin de  
 yuū jeē cuáha de xinī yā. Te Jesús  
 chí ni quenda sāhi yá ni yāha ya  
 mēhñú de, ni quenda ya ini templo  
 cuahān yā.

### Jeē ní nasávāha ya iin tēe ni cacu cuáá

**9** Te jeē jíca Jesús cuahān yā, te  
 ni jito ya nuū iin tēe ni cacu  
 cuáá. <sup>2</sup> Te tēe cáscuáha jíin yá ni  
 cacajnūhún de ya:

Maestro, ¿naun ni cacu cuáá tēe  
 yáha? ¿A cuéchi tátá de náná de  
 cúu, chí cuéchi máá de cúu, chí  
 naún?

<sup>3</sup> Te ni cahān Jesús:

Nasūu cuéchi máá de, ni nasūu  
 cuéchi tátá de náná de cúu jeē  
 ní cacu de súcuan, chi sa suhva  
 návāha cuni ñáyuu jniñú jéhnú  
 sáha Yaā Dios jíin de. <sup>4</sup> Níní jēe  
 cúu nájnūhun nduú ini ñayīví, te  
 cánuú sáha ri jniñú Yaā ní tají rúhū.  
 Chi quee tiempo jeē coo nájnūhun  
 jecuáá, jeē tuá cuu sájniñú ni iin.  
<sup>5</sup> Níní jēe iyó rí ini ñayīví te cúu  
 ri luz jeē cúndijin ini anuá ñáyuu  
 ñayīví, návāha jecūhun ni i siquī  
 Yaā Dios. Achí yá.

<sup>6</sup> Te ná ni cahān yā súcuan, te ni  
 tesīhi yá nuū ñúhun, te ni sáha ya  
 ndehyū jíin tésīhi yá un, te ni tee  
 ya siquī tñūu tēe cuáá un. <sup>7</sup> Te ni  
 cahān yā jíin de:

Cuáhán núu pila Siloé te nacate  
 ró tñūu ró, achí yá. Te jnúhun Siloé  
 cuní cahān, ndute ní cascáca de ni  
 quee.

Yūcuán na te cuahān de, te ni nacate de tinūú de, te ni ndundijin-ni, te ni nandicó de vēji de. <sup>8</sup>Yūcuán na te ñayuu yúcu yajni jíin de, jíin ñáyuu jeē ní cajito jeē cúu de tēe cuáá, ni cacajñuhun jnáhan i:

¿A násūu tēe yáha cúu jeē ndeé-ni yāhá te jícán caridad?

<sup>9</sup>Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

<sup>10</sup>Yūcuán na te ni cacajñuhún i de:

¿Te ndese cúu jeē ní nanune tinūu ró núu súcuan?

<sup>11</sup>Te ni cahān de:

Tēe nání Jesús ni sáha de ndehyū, te ni tee de tinūu rí, te ni cahān de jíin rí: Cuáhán núu pila Siloé te nacate ró tinūu ró. Te ni jehēn rí, te ni nacate ri, te ni nanune-ni tinūu rí, achí de.

<sup>12</sup>Yūcuán na te ni cacajñuhún i de:

¿Ndeé nuū íne tēe ún? achí i.

Tu jíin rí, achí de.

**Jeē ní castíchí tēe fariseo  
tēe ni cacu cuáá**

<sup>13</sup>Yūcuán na te ni cajendeca i tēe ni iyo cuáá un núu tēe grupo fariseo. <sup>14</sup>Te quivī ndétātu cúu jeē ni sáha Jesús ndehyū jeē ní nanune ya tinūú de. <sup>15</sup>Te tēe fariseo un ní cacajñuhún tucu de tēe ún ndese ni nanune tinūú de. Te ni cahān de:

Ni tee de ndehyū siquī tinūu ná, te ni nacate ná, te ni ndundijin-ni tinūu ná, achí de.

<sup>16</sup>Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chi tu née iī de quivī ndétátú.

Te sava ga de chi ni cacahān:

¿Ndese cuu sáha tēe un táca jniñu jéhnú yáha te núu tēe íyó cuéchi cúu de?

Te ni cacusín de siquī yā. <sup>17</sup>Te ni cacajñuhún tucu de tēe ni iyo cuáá un:

Róhó, ¿ndese cáhán rō siquī tēe ni nanune tinūu ró núu súcuan?

Te máá de ni cahān de:

Íin tēe nácani jñuhun Yaā Dios cúu de, achí de.

<sup>18</sup>Te tēe hebreo un chi tu ní cácandíje de jeē ní íyo cuáá tēe ún te ni ndundijin tinūú de. Te ni cacana xiní tatá de náná de. <sup>19</sup>Te ni cacajñuhún de:

¿A yáha cúu sēhe ro jéē ní cacu cuáá cacahān rō? Núu súcuan ¿te ndese ni ndundijin tinūú de vijna? achí.

<sup>20</sup>Te ni cacahān tatá de náná de:

Suu sēhe ri cúu tēe yáha jéē ní cacu cuáá. <sup>21</sup>Te tu cájini rī ndese ni ndundijin tinūú de vijna, ni tu cájini rī ndé tēe ni nanune tinūú de. Cajñuhun ró maá de, chi je jéhnú de, te na cáchi máá de.

<sup>22</sup>Súcuan ni cacahān tatá de náná de, chi cáyühú de cájito de jnáhan de tēe hebreo. Chi je ni casándaā tēe un jéē núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quivī i ini vehe iī sinagoga. <sup>23</sup>Jeē yúcuan ní cacahān tatá de náná de: Cajñuhun ró maá de, chi je jéhnú de.



<sup>24</sup>Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jíto jínū Yaā Dios. Chi cājini rī jeē tēe íyó cuéchi cúu tēe ni nanune tinūu ró.

<sup>25</sup>Yūcuán na te ni cahān de:

Tu jíiní na núu íyó cuéchi de, chí naún. Te íyó ĩn jeē jíiní ná, cúu jeē tēe cuáá ní cuu ná, te vijna chi ni ndundijin tinūu ná. Achí de.

<sup>26</sup>Te ni cacajnuhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuan?

<sup>27</sup>Te ni cahān de:

Je ni cuu ni castūhun ná nuū ní, te tu ní cācuni ní cuatáhú ní. ¿Te najehē cācuni ni jēē cāchi tucu ná núu ní? ¿Te chí suni cācuni ni jíjnāhan ní candíje ní yá naún?

<sup>28</sup>Yūcuán na te ni cacahān neé jíin de, te áchí:

Máá ró chi cándíje ró tēe ún, te máá rí chi cācandíje rī Moisés. <sup>29</sup>Te cājini rī jeē ni cāhān Yaā Dios jíin Moisés. Te tēe yúcuán, ni tu cājini rī ndé nuū vēji de.

<sup>30</sup>Te ni cahān tēe ni iyo cuáá:

Náa ni na jēē cācāhān ni jēē tu cājini ní jeē vēji de nuū Yaā Dios, vēsú ni nanune de tinūu ná. <sup>31</sup>Te cājini yō jeē Yaā Dios tu jíini nahín yá jeē cājicān ñayuu iyó cuéchi. Chi jíini nahín yá nuū maá-ni ñayuu jeē cáchiñhún i ya te cásáha i jeē cuní yā. <sup>32</sup>Te ní vēji yó te tu ní jíini sōho cuítī yō jeē ĩn tēe nanune de tinūu inga tēe ni cacu cuáá.

<sup>33</sup>Te núu nasūu ndé nuū Yaā Dios vēji tēe ún, te ma cúu cuítī sáha de ĩn jniñu súcuan. Achí de.

<sup>34</sup>Te ni cacahān tēe hebreo un:

Róhó chí íyó ndasí cuéchi ró ndé quiví ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe ĩ sinagoga.

**Siquē ñayuu cáhiyo cuáá ánuá**

<sup>35</sup>Te ni jini jnūhun Jesús jeē ní caquenehen de tēe ún. Te ni nihín jnāhan ya jíin de, te ni cahān yā jíin de:

¿A cándíje ró Séhe Yaā Dios?

<sup>36</sup>Te ni cahān de:

¿Ndé ĩn cúu ya návāha candíje ná yá?

<sup>37</sup>Te ni cahān Jesús:

Je ni jito ró núu yā, te suu cúu ruhū jeē cāhán jíin ró, achí yá.

<sup>38</sup>Yūcuán na te ni jecuiñī yití de nuū yā, te ni cahān de:

Cándíje ná jēē nihín cúu Jitoho ná.

<sup>39</sup>Te ni cahān Jesús:

Vēji rī ini ñayīvi yáha jēē sándaā rī síquī ñayuu. Chi ñayuu jeē nájnūhun cácuáá ánuá, ndundijin ini anuá i jeē jécūhun ni i síquī rī. Te ñayuu jeē jéni ni i jeē cājecūhun ni i, nájnūhun nducuáá ánuá i. Achí yá.

<sup>40</sup>Te sava tēe fariseo jeē cáhiin jíin yá, ná ni cājini de jnūhun yáha, te ni cacahān de jíin yá:

¿Te chí jéni ni rō jeē suni tēe tu cājecūhun ni cácuu máá rí naún?

<sup>41</sup>Te ni cahān Jesús:

Núu jeē cácuu ró tēe tu jécūhun ni nuú, te ma cóo cuéchi ró. Te síquī jeē ní cacahān rō jeē cājecūhun ni rō, te tu cājetáhú ró, jeē yúcuán condee cuéchi síquī rō.

**Jnūhun yátá síquī lanchi**

**10** 'Jendaá cāhán rī jíin ró, núu yíhi lanchi ini corral cánevāha cáhnu ñayuu, te núu ndé tēe tu quiví de ichi yéhyí corral un, chí sa suhva inga lado cāa de



quívi de, tēe un cúu ñacuíhná, chi vēji jeē sacuíhná. <sup>2</sup>Te tēe quívi ichi yéhyí, chi tēe un cúu pastor ndíto lanchi. <sup>3</sup>Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhví lanchi máá de, te táva de tī. <sup>4</sup>Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquin tī de, chi náacuni tī tachī de. <sup>5</sup>Te ma cóndiquin tī yatā inga tēe, chi sa suhva cunu tī coto tī de, chi náacuni tī jeē nasūu jítoho tī cúu.

<sup>6</sup>Jnūhun yátá yáha ní cahān Jesús jíin ñáyuu, te tu ní cájēcūhun ni i na jnūhun cúu jeē ni cáhān yā.

### Jeésus cúu máá pastor vāha

<sup>7</sup>Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájnūhun yéhyí corral nuū quívicoo ñáyuu cácuu nájnūhun lanchi rī. <sup>8</sup>Tāca tēe jeē tu ní tájí Yāā Dios, jeē ní quijicoo de nde ná tu quee rī, cácuu de nájnūhun ñacuíhná, chi tu ní cástéén de jnūhun ndaā. Te ñáyuu cácuu nájnūhun lanchi rī, tu ní cájetáhu i de. <sup>9</sup>Máá rí cúu nájnūhun yéhyí. Te ñáyuu jeē jíin máá rí quívicoo, jnama rī i. Te cuu i nájnūhun lanchi jeē ndívicoo tī nuū yíhi vāha tī, te quéndaco tī nuū cáji vāha tī.

<sup>10</sup>Tēe cúhná chi máni vēji de jeē sacuíhná de lanchi, te cahni de, te snáa de. Te ruhū chi vēji rī návāha cotecu ñáyuu cácuu lanchi rī, te nde yōhyo vāha ndetū coo i. <sup>11</sup>Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē síquí tī. <sup>12</sup>Te ñin

tēe yíyāhu, nasūu pastor tī cúu de, chi nasūu lanchi máá de cúu tī. Te núu jíto de jeē vēji yihī, te stóo de lanchi, te jínu de cuahān de. Te yihī chi jnī tī lanchi, te sáha tī jeē jíte núu lanchi. <sup>13</sup>Te tēe yíyāhu ún chi jínu de cuahān de síquí jeē lanchi tátú cúu jeē ndíto de, te jeē yúcuu tu cúndáhu ni de tī.

<sup>14</sup>Máá rí cúu máá pastor vāha. Te jíni rī tāca ñáyuu cácuu nájnūhun lanchi rī, te máá i cájini i ruhū.

<sup>15</sup>Te yāha cúu nájnūhun jeē Tatá rī jíni yā ruhū, te máá rí jíni rī Tatá rī. Te cuu rī jeē síquí ñáyuu cácuu lanchi rī. <sup>16</sup>Te suni íyó gá ñáyuu jeē cácuu lanchi rī, te síin síin ñáyuu cácuu i. Te cánuú jeē suni condeca rī ñáyuu ún. Te cuatáhu i jnūhun cáhán rī. Te coyūcu cáhnu-ni ndíhi ñáyuu candíje, te coo ñin-ni pastor i.

<sup>17</sup>Te Tatá rī manī ndasí yá jíin rí síquí jeē jéhe rī máá rí jeē cúu rī jehē ñáyuu, te natecu tucu rī. <sup>18</sup>Ni ñin ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuu íyó poder rī. Súcuu ni cahān Tatá rī jeē sáha rī. Achí yá.

<sup>19</sup>Te jeē ní cajini jnāhan ñuu yā hebreo jnūhun yáha, te ni cacúsín tucu i. <sup>20</sup>Te cuehē i ni cacahān:

¿Naun cáchusóhó ró jeē cahán de? Chi núhun tachī ini de, te ni tīvi xíni de.

<sup>21</sup>Te sava ga i ni cacahān:

Tu súcuu cáhán tēe núhun tachī ini, nájnūhun cáhán tēe yáha. Te tēe núhun tachī ini, ¿á cuu nanune de tinūu tēe cuáá naún? Achí.

### Jeē ní casquéhichī i Jesús

<sup>22</sup>Te tiempo mójin cúu, te ñuu Jerusalén cánasáha ñáyuu vico

jeē cānucūhun ni i quivī ní cuhiī templo cáhnu. <sup>23</sup>Te jíca cuu Jesús ini templo, ini corredor jeē naní Salomón. <sup>24</sup>Te jnāhan ñuu yā hebreo ni cacutútú i nuū yā, te ni cacahān i:

¿Nasaa ga quivī sáha ró jéē ma cucáhnu ni rī? Cachi cají núu rī jijnāhan ri núu máá ró cúu Cristo.

<sup>25</sup>Te ni cahān Jesús:

Je ni castūhun rí nuū rō, te tu ní cácanđije ró. Tācā jniñu jeē ní tejniñu Tátá rī ruhū sáha ri, yūcuan stéén cají jéē maá yá ni tají rúhū.

<sup>26</sup>Te tu cácanđije ró, chi nasūú lanchi ri cácuu ró, nájñuhun je ni cahān rī jíin ró. <sup>27</sup>Ñayuu cácuu lanchi ri, chi nácuni i jeē maá rí cúu jeē cahán jíin i. Te jíin rī i, te cándiquin i ruhū. <sup>28</sup>Te cotecu i nńí cáni sáha ri, te ma jnahnú ndetū cuiti i. Te ni ñin ma cúu quende i ndaha ri. <sup>29</sup>Máá Tátá rī ni squívi ya i ndaha ri. Te cújéhnú ga maá yá vēsú táca gá. Te ni ñin ma cúu quende i ndaha ya. <sup>30</sup>Máá rí jíin Tátá rī, chi ñin-ni cúu ri, achí yá.

<sup>31</sup>Yūcuán na te jnāhan ñuu yā hebreo ni caquihin tucu de yuū jeē cuáha de xiní yā. <sup>32</sup>Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tátá rī. ¿Te á síquī jeē ni sáha ri jniñu váha cúu jeē cuáha ró yúu xiní rī núu sūcuan? Achí yá.

<sup>33</sup>Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xiní rō, chi síquī jeē cahán ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

<sup>34</sup>Te ni cahān Jesús:

Yósó núu tútu ley cánevāha ró jéē ni cahān Yaā Dios: Nájñuhun yaā cácuu ró, achí Yaā Dios, achí tutu. <sup>35</sup>Chi ñayuu jeē ní cajetáhú jñuhun ya, ni cahān yā jeē cácuu i nájñuhun yaā. Te cájini yō jeē ma cúu cahān yō jeē tú ndaā jñuhun cáhán tutu ii. <sup>36</sup>Núu sūcuan ¿te naun cácahān rō jeē jñuhun ndevāha cúu jeē ni cahān ri jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu ii, te ni tají yá ruhū vēji ri ini ñayívi. <sup>37</sup>Núu tu sáha ri jniñu sáha Tátá rī, núu sūcuan te ma candíje ró rúhū. <sup>38</sup>Te núu sáha ri, te vēsú tu cácanđije ró rúhū, te na cándíje ró síquī jniñu sáha ri ún. Te sūcuan te cucáhnu ni rō jeē ñin-ni cúu Tátá rī jíin rí, te ñin-ni cúu ri jíin Tátá rī. Achí yá.

<sup>39</sup>Yūcuán na te cánducú tucu de jniñ de ya. Te ni ndoñúhún-ni ya cuahān yā.

<sup>40</sup>Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. <sup>41</sup>Te ni quiijicoo cuehē ñayuu nuū yā, te ni cacahān i jíin táca jnāhan i:

Ndaā chi vēsú tu ní sáha Juan ni ñin jniñu jéhnú, te ni cundaā ndihí jñuhun ni cahān de síquī ndese sáha tēe yáha. Achí i.

<sup>42</sup>Te cuehē ñayuu jeē ni jéngoo nuū yā yūcuán, ni cacandíje i ya.

### Jeē ni jíhī Lázaro

**11** Te ni iyo ñin tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. <sup>2</sup>Te María

un jeē cúu cuāha Lázaro, suu ña cúu jeē ní chihi aceite perfume jehē Jitoho yō, te ni naschí ña jíin ixi xíní ña. <sup>3</sup>Te ndíndúú cuāha de un ní catají ña jnūhun cuahān nuū Jesús:

Tēe jeē maní ni jíin, cúhú de, áchí ña, áchí mozo.

<sup>4</sup>Te ná ni jini Jesús jnūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnú ya. Chi ruhū, Sēhe Yaā Dios, jíin cuéhyī yáha te stéén rī jeē suni cújéhnú máá rí. Achí yá.

<sup>5</sup>Te maní Jesús jíin Marta jíin cúhū ña jíin Lázaro. <sup>6</sup>Te vēsú súcuan te nuū ni níhīn yā jnūhun jeē cuhú de, te ni quendōo ya uū gā quivī nuū ndeé yá un. <sup>7</sup>Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

<sup>8</sup>Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xiní ní. ¿Te cúní ni quíhīn tucu ní yúcuan naún? Achí de.

<sup>9</sup>Te ni cahān Jesús:

Ma cúu cahni ñayuu ruhū núu ná tu quee maá quivī cuu rí. Chi jeē iyó rí ñayivī yáha cúu nájnūhun jeē iyó úxi uū hora ñin nduú. Te jeē sáha ri jeē cuní Yaā Dios, cúu rí nájnūhun tēe jeē jíca nduú, te tu cáchihi de jehē de, chi cúndijin nuū de ñayivī yáha. <sup>10</sup>Te tēe jeē tu sáha jeē cuní Yaā Dios, chi nájnūhun jíca de jecuāā, te nájnūhun cáchihi de jehē de, chi tu cúndijin ini anuá de. Achí yá.

<sup>11</sup>Yūcuán na te ni cahān tucu ya:

Amigo yō Lázaro quíxí de, te quihīn rī sáha ri jeē nátahū ni de. Achí yá.

<sup>12</sup>Yūcuán na te tēe cáscuáha un ní cacahān de:

Núu quíxí de te jíin yō jeē nduvāha de.

<sup>13</sup>Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de.

<sup>14</sup>Yūcuán na te ni cahān cají yá:

Je ni jihī Lázaro. <sup>15</sup>Te cúsiñ ni rī jeē tu ní cóyūcu yó yūcuán, návāha vāha ga candije ró jéē coto ró jniñu jéhnú sáha ri. Núu súcuan te na quíngoo yó núu ndíyi ún. Achí yá.

<sup>16</sup>Yūcuán na te Tomás, tēe cúu cuatí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

#### **Jesús cúu jeē sáha jeē nátecu te cotecu níí cáni**

<sup>17</sup>Te nuū ní quee Jesús, te jíin yā jeē ní cuu cuūn quivī yíndūji Lázaro. <sup>18</sup>Te yajni-ni íne ñuu Betania jíin ñuu Jerusalén, nájnūhun uū kilómetro yosáva.

<sup>19</sup>Te Marta jíin María, ni quecoo cuehē jnáhan ña hebreo jeē cahán i jnūhun ndeyí ni jíin ña jeē siquí jeē ni jíhī cuāha ña. <sup>20</sup>Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. <sup>21</sup>Te ni cahān Marta jíin Jesús:

Núu ní íyo ní yáha, te ma cúu cuāha ná núu. <sup>22</sup>Te vēsú súcuan te jíin na jéē tāca jéē cacán ni núu Yaā Dios, te sáha ya, achí ña.

<sup>23</sup>Te ni cahān Jesús jíin ña:

Natecu cuāha ró.

<sup>24</sup>Te ni cahān Marta:

Jíní na jéē nátecu de quivī nátecu tāca ndíyí nde quivī jínu ñayiví.

<sup>25</sup>Te ni cahān Jesús:

Maá rí cúu Yaā sáha jeē nátecu jíní jéē cótecu ní cání. Ñayuu candíje jeē jnáma ri i, vésú na cúu i, te natecu i. <sup>26</sup>Te ñayuu cátecu te cándíje i ruhū, cotecu i ní cání andiví. ¿A cándíje ró jnúhun yáha? Achí yá.

<sup>27</sup>Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

#### Jeē ni ndáhyū Jesús nuū yíndūji Lázaro

<sup>28</sup>Te ná ni cahān ña súcuan, te cuahān-ni ña, cuacana yuhu ña cuhū ña María:

Maá Maestro ni quee yā, te cána ya rohó, achí ña.

<sup>29</sup>Te jeē ní jini María jnúhun yáha, te yachí ni ndocuiñí ña, cuahān ña nuū yā. <sup>30</sup>Te ná tu quiví Jesús ñuu, chi ni ndōo-ni ya nuū ni jéjnahan Marta yā. <sup>31</sup>Te ñayuu hebreo un jéē cáyucú ini vehe jíní María, jeē cacahān i jnúhun ndeyí ni jíní ña, ni cajito i jeē yachí ni ndocuiñí ña cuahān ña. Te ni candiquin i ña cuango i, chi cájeni ni i jeē cuándahyū ña nde nuū yíndūji ndíyí.

<sup>32</sup>Yūcuán na te ni jinū María nuū íne Jesús, te ni jecuiñí yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núú, achí ña.

<sup>33</sup>Te ni jito Jesús jeē ndahyū ña jíní jéē cándahyū ñayuu vējicoo jíní ña. Te yōhyo ni nducuíhyá ni yā, te

ni jnahuhū ni yā jeē cundáhú ni yā i. <sup>34</sup>Te ni cajnúhun yá ña:

¿Ndé mí ní cachindūji ró de?

Te ni cacahān ña jíní yá:

Quíhín yō te cuni ní, achí ña.

<sup>35</sup>Te ni ndahyū Jesús. <sup>36</sup>Yūcuán na te ni cacahān ñayuu hebreo un: Condēhe náa yōhyo maní de jíní ndíyí ún.

<sup>37</sup>Te sava i chi ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuú? achí i.

#### Jeē ní natecu Lázaro

<sup>38</sup>Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñin yaū cava cúu, te yuyáú un ndíhyú ñin yuū. <sup>39</sup>Te ni cahān yā:

Tejiyo yuū un jíníhan ró, achí yá.

Te Marta, cuāha ndíyí un, ní cahān ña:

Je jéén xicō de, chi je ni cuu cuūn quiví yíndūji de.

<sup>40</sup>Te ni cahān Jesús jíní ña:

¿A násūú je ni cahān rí jíní ró jeē núu candíje ró te coto ró jéē yōhyo cújéhnu Yaā Dios jíní poder yā? achí yá.

<sup>41</sup>Yūcuán na te ni catejiyo i yuū jeē ndési yuyáú ndíyí ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. <sup>42</sup>Te jíní na jéē niní sáha ní jéē jicán na. Te jeē váha ñayuu cáhíin yáha cúu jeē súcuan cáhán na, návāha na cándíje i jeē maá ní ní tají sáña.

<sup>43</sup>Te ná ni cahān yā súcuan, te ni cahān jee ya:

Lázaro, quenda quíji ró, achí yá.

<sup>44</sup>Te ni quenda-ni tēe ni jihī ún, te ñúsúcún ndaha de s̄h̄in de jíin tira sahma. Te nuū de ñúsúcún iin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

### Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

<sup>45</sup>Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. <sup>46</sup>Te sava i chi cuangoo i nuū tēe grupo fariseo, te ni cacastūhún i ndese ni sáha Jesús. <sup>47</sup>Yūcuán na te tēe fariseo un jíin sūtū cácujeñhu ni candutútú de junta jíin táca gá tēe cácujeñhu. Te ni cacahān de:

¿Ndese sáha yó? Chi tēe ún yōhyo cuehē jniñu jéñhu sáha de. <sup>48</sup>Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujeñhu, te canu de templo cáhnu yó, te scuíté núu de ñayuu nación yō, achí de jíijnáhan de.

<sup>49</sup>Te iin jnáhan de jeē naní Caifás, jeē cúu máá sūtū cujeñhu ga cuiyā ún, ni cahān de:

Róhó chi tu cájini cuiti rō, <sup>50</sup>ni tu cájecūhun ni rō jeē váha ga jeē cúu iin tēe jehē ñayuu nación yō vēsú jeē náa ndivii i, áchí de.

<sup>51</sup>Te tu ní cáhán de jnūhun yáha jēe jéni ni maá de. Chi siquī jeē cúu de sutū cujeñhu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo. <sup>52</sup>Te nasūu máá iin-ni jehē nación hebreo, chi

suni jehē ndivii ñayuu cácuu sēhe Yaā Dios jeē ní cajitē núu táca nación, návāha iin na cuu i jíijnáhan i. <sup>53</sup>Yūcuán na te nde quivī ún te táca tēe hebreo cácujeñhu un, ní casquijnáhan de jnūhun jeē cáhni de Jesús.

<sup>54</sup>Jeē yūcuán tuá ní jíca ndijin yā nuū jnáhan ñuu yā hebreo un, chi ni quenda ya región Judea, te cuahān yā iin ñuu naní Efraín, nuū iyó yajni ñuhun téhé. Te ni condee yā yūcuán jíin tēe cácuáha jíin yá.

<sup>55</sup>Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuángoo i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua. <sup>56</sup>Te cánuanducú i Jesús, te cácajnūhun jnáhan i ini templo:

¿Ndese cájени ni rō? ¿A quiji de vico, chí tuú? Achí i.

<sup>57</sup>Te sutū cácujeñhu jíin tēe fariseo ni candacu de jniñu jeē núu ndé iin ñayuu jiní ndé nuū íne ya, te na cástūhún i, návāha jniñ de ya.

### Jeē ní chuhun María perfume jehē Jesús

(Mt. 26.6-13; Mr. 14.3-9)

**12** Te cúmani iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. <sup>2</sup>Te ni casáha i iin vico xíní jeē yíñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. <sup>3</sup>Yūcuán na te María ni quee ña jíin nájnūhun sava litro aceite perfume jeē máni ita nardo cúu, te yōhyo yahu ndéé. Te ni

chuhun ña jehē Jesús, te ni nasíchí ña jíin ixi ña. Te ní ini vehe un ní chitú xícō perfume un. <sup>4</sup>Yūcuán na te ni cahān Judas Iscariote sēhe Simón, iin tēe scuáha jíin yá un, te suu de cúu jeē nastúu de ya:

<sup>5</sup>¿Najehē tu ní cúyāhu perfume yáha jēē uní ciento denario, te cuāha yó núu ñáyuu ndahú núu. Achí de.

<sup>6</sup>Súcuan ni cahān de, nasūu jēē cundáhú ndije ni de ñayuu ndahú, chi sa suhva jeē cúu de tēe cuíhná. Chi máá de ndíso yijni xūhún, te quíhin cuíhná de jeē cájequin tāca tēe ún. <sup>7</sup>Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ní sātūhva ña ruhū nde quivī jeē quíndūji ri. <sup>8</sup>Chi níni cáyūcu ñáyuu ndahú jíin ró, te ruhū chi tuá condee rī jíin ró. Achí yá.

#### Jeē ní casquíjnáhan de jnūhun jeē cahni de Lázaro

<sup>9</sup>Te cuehē ñayuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá iin jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā. <sup>10</sup>Yūcuán na te sutū cácujeéhu ni casquíjnáhan de jnūhun jeē suni cahni de Lázaro. <sup>11</sup>Chi jeē síquí Lázaro te ni cujiyo cuehē jnáhan ñuu de hebreo nuū de, te cácadíje i Jesús.

#### Jeē ni quívī Jesús Jerusalén

(Mt. 21.1-11; Mr. 11.1-11; Lc. 19.28-40)

<sup>12</sup>Te inga quivī ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén. <sup>13</sup>Te ni cajehnde i ndaha

ñúu, te ni quendacoo i cuajnahān i ya. Te cácana jee i:

Yōhyo cújéhu Yaā Dios. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Yōhyo vāha Yaā cúu Rey nación yō Israel. Achí i.

<sup>14</sup>Te ni nihīn Jesús iin burro, te ni jecosō yā tī, nájñūhun cáhān tutu ii:

<sup>15</sup>Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō, te yósó yá iin burro.

Achí tutu.

<sup>16</sup>Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jēē yosó núu tútu ii. Te nde ná ni ndujéhu Jesús jeē cuánuhun yā andívī, te sáá te ni canucūhun ni de tāca jnúhun yósó síquī yā, jíin jēē ní casáha de súcuan jíin yá.

<sup>17</sup>Te ñayuu ní cahīin jíin yá ná ni cana ya xinī Lázaro nuū ní yíndūji de, te ni nastécu yā de, ni canacani i jnūhun ndese ni sáha ya.

<sup>18</sup>Jeē yúcuan ní quendacoo ñayuu cuehē un, ní jejnahan i ya, chi ni cajini jnūhun i jeē ni sáha ya jniñu jéhu un jēē ni steén yā poder yā.

<sup>19</sup>Yūcuán na te ni cacahān máá tēe fariseo:

Vijna te je ni cajito yó jēē ma cúu cuitī gā casi yō. Chi jító yó jēē ndívī cuitī ñayuu cuango i jíin de. Achí de jíjnáhan de.

#### Ñayuu nación Grecia nánducú i Jesús

<sup>20</sup>Te sava ñayuu nación Grecia, suni ni quijicoo i ñuu Jerusalén vico pascua un jēē chiñúhún i Yaā

Dios. <sup>21</sup>Te ni quecoo i nuū Felipe, tēe ñuu Betsaida ndañū Galilea. Te ni cacahān i jíin de:

Tátā, cáconi ná cahān na jíin Jesús, achí i.

<sup>22</sup>Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús. <sup>23</sup>Te ni cahān Jesús jíin de:

Je ni quee quivī jeē ndujéhnu Yaā ní nduu tēe. <sup>24</sup>Te jendaá cahán rī jíin ró, ñin nunī trigo núu tú ñingava nuū ñūhun te quindūji, núu súcuan te quendōo máá ñin-ni. Te núu quindūji, te nacayā cuehē ndasí. Te suni súcuan cánuú cuu rī quindūji ri, návāha coo cuehē ñayuu jeē ndúu i sēhe Yaā Dios. <sup>25</sup>Te na-ni ñayuu núu tu jéhe i jnūhun ndoho i jeē siquí ruhū, te jnahnū ndetū i. Te ñayuu jeē jéhe i jnūhun ndoho i jeē siquí ruhū ini ñayīvi yáha, cotecu i níí cáni andiví. <sup>26</sup>Núu ndé ñayuu cuní i cuajníñu i nuū rī, na cóndiquin i ruhū. Te nuū cóndee rī, suni yūcuán condee ñayuu jejníñu nuū rī. Te ñayuu jejníñu nuū rī, chi sáha Tátá rī jeē kujéhnu i.

### Jeē ni cahān Jesús jeē cuu yā

<sup>27</sup>Te vijna te cúcuíhyá ndasí ni rī sáha jnūndóho quiji siquí rī. ¿Te ndese cahān rī? ¿A cahān rī jíin Tátá rī: Jnama ní sáña núu jnūndóho jeē quiji siquí ná, achi rī? Ma cúu, chi jeē siquí yúcuan cúu jeē véji rī. <sup>28</sup>Tátā, stéén ni jéē kujéhnu ndasí ní jíin poder ni, achí yá.

Yūcuán na te ichi ándiví ní cahān ñin jnūhun:

Je ni steén rī jeē kujéhnu ri, te sáha tucu ri inga jínu, achí yá.

<sup>29</sup>Te ni cajini ñayuu cáhiin yūcuán, te ni cacahān i jeē taja cáhán. Te sava ga i ni cacahān:

Ñin ndajéhé Yaā Dios ni cahān jíin yá.

<sup>30</sup>Te ni cahān Jesús jíin i:

Tu ní cáhán jnūhun yáha jéē siquí ruhū, chi sa suhva návāha cuni rō siquí jnūhun jeē ni cáhán yā jíin rí. <sup>31</sup>Vijna cúu jeē sándaā Yaā Dios siquí cuéchi ñayuu ñayīvi yáha. Vijna cúu jeē scúnu ya jexeén jeē ndácu jniñu ini ñayīvi yáha. <sup>32</sup>Te ruhū, núu na jínu condita caa ri cuu rī ini ñayīví, te sáha ri jeē jnāā tāca ñayuu quivícoo i ndaha ri, achí yá.

<sup>33</sup>Súcuan ni cahān yā jeē steén yā ndese modo cuu yā. <sup>34</sup>Te ni cacahān ñayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā níí cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ñin cúu máá Yáa ní nduu tēe núu súcuan? Achí i.

<sup>35</sup>Yūcuán na te ni cahān Jesús:

Máá jecu na quiví condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájñūhun quendōo ró núu néē. Chi ñayuu cájica nájñūhun nuū néē, tu cájini i ndé nuū cuángoo i. <sup>36</sup>Núu súcuan te níni ndéé gá ri jíin ró, te candíje ró rúhū jeē cúu ri luz, návāha nduu ró ñayuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni steén yā maá yá nuū i.

### Jeē tu ní cácandíje ñayuu hebreo jeē cúu ya Cristo

<sup>37</sup>Te vésú cuehē jniñu jéhnu ni sáha Jesús jeē steén yā poder yā

nuū i, te tu ní cácandíje i ya. <sup>38</sup>Chi squícu nahín jnúhun ni cahān Isaías, tēe ni nacani jnúhun Yaā Dios nde jenahán:

Tátā Yaā Dios, tu ní cácandíje ñayuu jnúhun ni canacani ná, te tu ní cácandíje i jniñu jéhnú jeē ni stéén ni poder ni núū i. Achí Isaías. <sup>39</sup>Jeē yúcuán tu ní cúu candíje i, chi ni cahān tucu Isaías:

<sup>40</sup>Ni sáha ya jeē nájñuhun cáhīyo cuáá ánuá i, jíín jéē cácanihni ni i, návāha coo nájñuhun jeē tu cájito i, te ni ma jécūhun ni i, ni ma násāma ini i quíivicoo i nuū rī, jeē nasávāha ri anuá i nuū cuéchi i.

Achí Cristo, achí tutu. <sup>41</sup>Jnúhun yáha ní cahān Isaías, chi je ni jito de ndese yōhyo cújéhnú Jesús, te ni cahān de ndese coo quívī jeē quíji ya.

<sup>42</sup>Te vēsú súcuán te cuehē ñayuu hebreo chi ni cacandíje i ya, te suni nde jíín sava tēe cándacu jniñu. Te tu ní cácachí de jeē cácandíje de ya, chí siquī jeē cáyūhú de tāca tēe fariseo. Chi núu súcuán te quenehen ún de ini vehe ií sinagoga jeē ma cuáha ga jnúhun quíivicoo de. <sup>43</sup>Chi cácusīī gā ni de jeē cújéhnú de sáha ñayuu, vēsú jeē cújéhnú de sáha Yaā Dios.

**Jnúhun cáhán Jesús cúu jeē sándaā siquī ñayuu**

<sup>44</sup>Te ni cahān jee Jesús: Ñayuu cácandíje ruhū, nasūu máñúhún-ni ruhū cácandíje i, chí suni cácandíje i nde maá Tátá rī,

Yaā ní tají rúhū. <sup>45</sup>Te ñayuu cájito nuū rī, suni cájito i nuū Yaā ní tají rúhū. <sup>46</sup>Maá rí jeē cúu ri luz cúndijin ini anuá ñayuu, ni quíji ri ini ñayīvi návāha tāca ñayuu cácandíje ruhū, ma cáca i nájñuhun nuū néē. <sup>47</sup>Te núu iin ñayuu jíín sōho i jnúhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen ri cuéchi siquī ñayuu ñayīví, chí sa suhva jeē jnáma ri i. <sup>48</sup>Te ñayuu jeē casquéhichī i ruhū te tu cájetáhú i jnúhun cáhán rī, íyó iin jeē sándaā siquī i. Suu tāca jnúhun jeē ni cáhán rī, jnúhun un cúu jeē ndenehen cuéchi siquī i quívī jíínu ñayīví. <sup>49</sup>Chi tu cáhán rī jeē cúu ni maá rí, chí Tátá rī, Yaā ní tají rúhū, maá yá ni ndacu jniñu nuū rī ndese cahān rī jíín ndese stéén rī. <sup>50</sup>Te jíín rī jeē jniñu ndácu Tátá rī sáha jeē cótecu ñayuu níí cáni. Núu súcuán te jnúhun cáhán rī, chí máni jnúhun jeē ní cachi Tatá rī cúu, áchí yá.

**Jeē ní nacate ya jehē tēe cáscuáha**

**13** Te jehíni inga quívī te quejéé vico pascua. Te je jíín Jesús jeē ní quee quívī jeē quénda ya ñayīvi yáha quínuhun yā nuū Tatá yā. Te níni cúndáhú ni yā ñayuu maá yá jeē cáyūcú ini ñayīví. Te vijna jeē jíínu jeē íne ya ñayīví, te sáha ya iin jniñu jeē steén cají yá jeē cundáhú ni yā i.

<sup>2</sup>Te jexeén je ni squívi ini anuá Judas Iscariote sēhe Simón, jeē vijna nastúu de ya. <sup>3</sup>Te jíín Jesús jeē vēji ya nuū Yaā Dios, te nuhūn yā nuū Yaā Dios, jíín jéē ni sáha Tátá yā jeē cújéhnú ya



siqui ndihi-ni. <sup>4</sup>Te cúxini ya jíin tée cáscuáha jíin yá, te ni ndocuñi yá. Te ni stáa ya sahma ndíi ya, te ni jihni yá iin toalla chíi ya. <sup>5</sup>Te ni chuhun ya ndute ini iin tijehē. Te ni quejéé yá nácate ya jehē tēe cáscuáha. Te násichí yá jíin toalla jeē nuhní chíi ya.

<sup>6</sup>Te ni jinū yā nuū Simón Pedro. Te ni cahān Pedro jíin yá:

¿Sa máa ní nacate jehē ná naún?

<sup>7</sup>Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

<sup>8</sup>Te ni cahān Pedro jíin yá:

Ma nácate cuiti ni jéhē ná.

Te ni cahān Jesús:

Núu tú nacate ri jehē rō, te ma cúu cundúú rō jíin rí.

<sup>9</sup>Te ni cahān Simón Pedro:

Núu súcuan cúu te nasūu máa jéhē-ni ná, chi suni nacate ní ndaha ná jíin xíní ná, áchí de.

<sup>10</sup>Te ni cahān Jesús jíin de:

Tēe jeē sa ní jichi, tu jíni ñúhún ndundoo ní cáhnu de, chi máa jéhē-ni de, chi je íyó ndoo ní cáhnu de. Te máa rō chi je ni candundoo rō. Te tú ndihi rō cáhiyo ndoo.

<sup>11</sup>Chi je jíni yā ndé iin de cúu jeē nastúu de ya, te jeē yúcuan ní cahān yā: Tú ndihi rō cáhiyo ndoo.

<sup>12</sup>Te nuū ni jínu ni nacate ya jehē de jíjnáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jíin rō?

<sup>13</sup>Cácahān rō jeē Maestro jíin Jítoho rō cúu ri, te ndaā cácahān rō, chi suu ndije cúu ri. <sup>14</sup>Núu súcuan te vēsú Maestro rō jíin Jítoho rō cúu ri, te ni nacate ri jehē rō jíjnáhan

rō, te suni súcuan cánuú jéē nacate máa rō jehē jnáhan rō. <sup>15</sup>Chi jniñu yáha ni sáha ri jeē steén rī nuū rō jeē suni súcuan sa cuajniñu rō núu jnáhan rō, nájnūhun sa máa rí ni jejniñu ri nuū rō. <sup>16</sup>Jendaá cahán rī jíin rō jeē iin mozo tu cújéhu de nuū patrón de, te tēe jíca jniñu táhu nuū de, te cújéhu de nuū tēe ni tají de. Te máa rō cácuu mozo rī, te na cuajniñu rō núu jnáhan rō nájnūhun ni steén rī nuū rō. <sup>17</sup>Te núu ni cajecūhun ni rō jnūhun yáha, te yōhyo ndetū rō te núu squícu rō.

<sup>18</sup>Te nasūu jéē cahán rī jeē ndihi rō ndetū, chi je jíni rī tāca rōhó jéē ní nacāji ri. Te cánuú squícu jnūhun yáha jeē cáhán tutu i: Tēe yéji staā jíin rí, ni ndiō cuñí de siquī rī, achí tutu. <sup>19</sup>Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje rō jéē maá rí cúu Yaā ní tají Yaā Dios. <sup>20</sup>Jendaá cahán rī jíin rō jeē na-ni ñayuu jeē cuatáhu i tāca jéē tají rí, te ruhū jetáhu i. Te ñayuu jetáhu rúhū, suni jétáhu i Yaā ní tají rúhū vēji ri, achí yá.

**Jeē ní cachi yā jeē nastúu Judas yā**

(Mt. 26.20-25; Mr. 14.17-21; Lc. 22.21-23)

<sup>21</sup>Te ná ni cahān Jesús tāca jnūhun yáha, te ni cucuíhyá ndasí ni yā. Te ni cahān cají yá:

Jendaá cahán rī jíin rō jíjnáhan rō jéē iin máa rō nastúu ruhū, achí yá.

<sup>22</sup>Yūcuán na te tēe cáscuáha jíin yá, ni candacoto de nuū jnáhan de, cájeni ni de ndé iin de cúu jeē ni cáhān yā. <sup>23</sup>Te iin máa tēe scuáha jeē maní gā yā jíin, néne de xiin ya mesa jeē cácuixini de jíin yá. <sup>24</sup>Te ni sáha Simón Pedro seña nuū de jeē

na cajnūhún de ya ndé ìn de cúu jeē ní cáhān yā. <sup>25</sup>Yūcuán na te tēe un ní scáyì de máá de nuū Jesús, te ni cajnūhún de ya:

¿Ndé ìn de cúu? áchí de jíín yá.

<sup>26</sup>Te ni cahān Jesús:

Na chūndaji ri staā te cuāha ri nuū ìn de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón.

<sup>27</sup>Te jeē ní quihín de staā ún, te ni quīvi-ni Satanás ini anuá de. Yūcuán na te ni cahān Jesús jíín de:

Jniñu jeē sáha ró, na sáha yachī rō.

<sup>28</sup>Te ni ìn tēe cáyeji staā jíín yá, tu ní cájecūhun ni de naun ni cahān yā súcuan jíín de. <sup>29</sup>Chi sava de cájeni ni de jeē ni cáhān Jesús jíín Judas jeē cuāan de jeē jíni ñúhún yá vico ún, chí jēe cuáha de jecu xūhun núu ñayuu ndahú. Chi máá de ndíso yíjñi xūhún. <sup>30</sup>Te jeē ní yeji de staā ún, te ni quenda-ni de cuahān de. Te je ni cuaa.

### Jeē ní ndacu ya jniñu jéé

<sup>31</sup>Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū ri, te suni jíín rúhū te cuni ñayuu ndese cújéhnū Yaā Dios. <sup>32</sup>Te núu jíín rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu ri Sēhe ya. Te yachī-ni stéén yā. <sup>33</sup>Séhē, tuá nahán condee rī jíín ró jijnáhan ró. Te nanducú ró ruhū, te nájñuhun ni cahān ri jíín táca jnáhan yó hebreo, suni súcuan cáhān ri jíín ró vijna, jeē ma cúu

jiniñu ró núu quihín rī. <sup>34</sup>Te vijna te ndácu ri ìn jniñu jéé núu rō, jeē na cúndáhú ni rō jnáhan ró. Nájñuhun cúndáhú ni rī rohó, suni súcuan na cúndáhú ni rō jnáhan ró. <sup>35</sup>Te núu cúndáhú ni rō jnáhan ró, súcuan te cuni táca ñáyuu jeē cácuu ró tēe cáscuáha jíín rí, achí yá.

### Jeē ní cachi yā jeē yūhu Pedro cahān de jeē jíni de ya

(Mt. 26.31-35; Mr. 14.27-31; Lc. 22.31-34)

<sup>36</sup>Te ni cahān Simón Pedro jíín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chí ma cúu condiquín rō ruhū vijna, te cúcuéé gá te jinū rō.

<sup>37</sup>Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jéé siquí ni.

<sup>38</sup>Te ni cahān Jesús:

¿A jéni ni rō jeē tu yúhú ró cuu rō jeē siquí rí? Jendaá cahān rī jíín ró jeē nde ná tu cana líhli, te uní jínu yūhu ró te cahān rō jeē tu jíni ró ruhū. Achí yá.

### Jesús cúu ichi jeē jinú yō nuū Tatá yā

**14** Te ni cahān gā yā: Ma cucuíhyá ni rō siquí táca jnúndóho. Na cándíje ró jéé sáha Yaā Dios jehē rō, te suni na cándíje ró jéé sáha ri jehē rō. <sup>2</sup>Chi nuū ndeé Tátá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rī nuū rō nuú. Núu súcuan te quihín rī quisátūhva rī nuū cóyūcu ró. <sup>3</sup>Te jeē quihín rī sátūhva rī nuū cóyūcu

ró, te ndiji ri quinaquihin ri rohó quihín yō, návāha suni coyūcu ró nuū cóndee maá rí. <sup>4</sup>Te je cájini rō ndé nuū quihín rī, te cájini rō ndese jinū rō yūcuán. Achí yá.

<sup>5</sup>Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

<sup>6</sup>Te ni cahān Jesús jíin de:

Máá rí cúu ichi jinū rō andiví, te máá rí cúu jnūhun ndaā jíin jnūhun cotecu rō níí cáni. Te ni ñin ma jinū nuū Tatá rī te núu tú ruhū. <sup>7</sup>Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

<sup>8</sup>Te ni cahān Felipe jíin yá:

Stéén ni Tatá ni núu ná, te na cuvāha ni na jíjnáhan ná, áchí de.

<sup>9</sup>Te ni cahān Jesús:

Felipe, je ni cuu cuehē quiví jica ri jíin ró jijnáhan ró, ¿te á ná tu cuni rō ndé ñin cúu ri naún? Tēe jeē jito ruhū, suu Tatá rī jito de. Núu súcuan ¿te najehē cahán rō jeē steén rī Tatá rī nuū rō? <sup>10</sup>¿A tu candíje ró jéé ñin-ni cúu ri jíin Tatá rī, te Tatá rī ñin-ni cúu ya jíin rí? Tāca jnúhun cáhán rī jíin ró, nasūu jnúhun máá rí cúu. Chi Tatá rī jeē ñin-ni cúu ya jíin rí, máá yá sáha tācá jniñu jeē sáha ri. <sup>11</sup>Candíje ró jíjnáhan ró jéé ñin-ni cúu ri jíin máá Tatá rī, te Tatá rī ñin-ni cúu ya jíin rí. Te núu tu cájecūhun ni rō, te candíje ró rúhū siquī tācá jniñu sáha ri. <sup>12</sup>Jendaá cahán ri jíin ró, núu ndé ñayuu candíje ruhū, jniñu jéhnu jeē sáha ri yāhá, suni sáha i. Te jéhnu ga jniñu sáha i vesú yāhá, chi quinhun rī nuū ndeé Tatá rī.

<sup>13</sup>Te tācá na-ni vé cacán rō nuū Tatá rī siquī jeē cá candíje ró jéé cúu ri Sēhe ya, te sáha ri jeē cacán rō, te súcuan steén rī jeē yóhoyo cújéhnu Tatá rī. <sup>14</sup>Chi tācá na-ni vé cacán rō siquī jeē cá candíje ró rúhū, te sáha nahín rí.

### Jeē ni jéjnūhun ya jeē tají yá Espíritu Santo

<sup>15</sup>Te núu maní rō jíin rí jijnáhan ró, te na squícu ró jniñu ndácu ri nuū rō.

<sup>16</sup>Te cacān tahu rī nuū Tatá rī, te tají yá ñnga Yaā chindéé ñáhán rōhó, te sáha ya jeē cóo siñ ni rō jijnáhan ró. Te Yaā un cúu máá Espíritu jeē steén jnūhun ndaā, te condee yā jíin ró níí cáni. <sup>17</sup>Te ñayuu ñayiví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndeé yá jíin ró, te condee yā ini anuá rō níí cáni. <sup>18</sup>Ma stóo uun ri rohó, chi ndiji ri nuū rō. <sup>19</sup>Jecu na quiví te ma cóto ga ñayuu ñayiví núu rī. Te máá ró jijnáhan ró chi coto ró núu rī, chi cotecu rī níí cáni, te jeē yúcuun suni cotecu maá ró. <sup>20</sup>Te quiví ún te cuni rō jeē ñin-ni cúu ri jíin Tatá rī, te máá ró ñin-ni cúu ró jíin rí jeē ndeé rí ini anuá rō jijnáhan ró. <sup>21</sup>Te na-ni ñayuu núu ññuhun ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tatá rí jíin i. Te suni ruhū coo maní rí jíin i, te steén rī nuū i jeē nduú rí jíin i. Achí yá.

<sup>22</sup>Te ni cahān Judas jíin yá (te nasūu tée cúu Iscariote):

Najehē cúu jeē steén ni máá ní nuū ná, te nuū ñayuu ñayiví chi tuú?

<sup>23</sup>Te ni cahán Jesús:

Ñayuu jeē maní jíin rí, chi cásquicu i jeē cahán rī. Te coo maní Tatá rī jíin i. Te Tátá rī jíin máá rí quiijcoo ri cundúú rí jíin i. <sup>24</sup>Te ñayuu jeē tú maní jíin rí, tu cásquicu i jeē cahán rī. Te jnūhun cájini sōho ró cahán rī, nasūu jnūhun máá rí cúu, chi jnūhun máá Tatá rī jeē ní tají rúhū cúu.

<sup>25</sup>Tāca jnūhun yáha cahán rī jíin ró níni íne ga rī jíin ró. <sup>26</sup>Te Tátá rī chi tají yá Espíritu Santo, quiji nucuññi nuū rī. Te máá yá chindéé ñáhán yá rohó, te sáha ya jeē cóo sñi ni rō. Te stéén yā tāca jnūhun nuū rō, te nacachi tucu ya tāca jéé ni cahán rī jíin ró.

<sup>27</sup>Te jeē quihín rī, te sáha ri jeē cóo ndeyí coo sñi ni rō. Nájñūhun íyó ndeyí sñi ni maá rí, suni súcuan coo ndeyí sñi ni rō sáha ri. Te jeē sáha ri jeē cóo ndeyí sñi ni rō, tu quijnáhan jíin jnūhun ndeyí cácahán ñayuu ñayívi. Ma cucuíhyá ni rō siquī tāca jnúndóho, te ni ma yūhu ró. <sup>28</sup>Je ni cajini sōho ró jéé ni cahán rī jeē quihín rī, te ndiji ri cundúú rí jíin ró. Te núu cáhiyo maní vāha ró jíin rí, te cusñi ni rō jeē ni cahán rī jeē nuhún rī nuū Tatá rī. Chi cújéhnū ga Tatá rī vijna vésū ruhū. <sup>29</sup>Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró rúhū jijnáhan ró.

<sup>30</sup>Ma cahán rī cuehē gā jnūhun jíin ró, chi je vēji jexeén jeē ndácu jniñu ini ñayívi yáha. Te tú na vé cúu sáha siquī rī nuú. <sup>31</sup>Te na cóo nájñūhun ni ndacu Tatá rī jniñu nuū rī, návāha cuni ñayuu ñayívi jéé maní rī jíin Tatá rī, te

sáha ri jniñu ní ndacu ya. Ndocuññi jijnáhan ró na quíngoo yó. Achí yá.

Jesús cúu nájñūhun yoyúcu uva

**15** <sup>1</sup>Máá rí cúu nájñūhun yoyúcu uva váha ndaā, te Tatá rī cúu nájñūhun tēe ndíto yoyúcu uva un. <sup>2</sup>Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuehē gā ndehē. <sup>3</sup>Te máá ró chi je ni candundoo ánuá rō jíin jnūhun ni steén rī nuū rō, nájñūhun ndúndoo ndaha uva. <sup>4</sup>Na cundúú ró jíin rí, te suni máá rí cundúú rí jíin ró. ñin ndaha uva ma cúu cuāha ndehē jeē maá, te núu tu yíjnñi jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

<sup>5</sup>Máá rí cúu yoyúcu un, te máá ró cácuu ndaha ri. Ñayuu jeē nduú jíin rí, te ruhū ndúú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuiti na jniñu váha cuu sáha ró. <sup>6</sup>Ñayuu jeē tu cundúú jíin rí, quende yā i nájñūhun ñin ndaha uva, te ichi. Te ndoho i nájñūhun ndaha uva un jéé ndutútú te cayū nuū ñuhún.

<sup>7</sup>Núu ndúú ró jíin rí, te cáñuhun ni rō jnūhun cahán rī, yūcuán na te cacān rō na-ni vé cácuni rō, te sáha ri jeē cácahán rō. <sup>8</sup>Te núu cásáha ró cuehē jniñu váha, súcuan cástéén rō jeē cúu ndije ró ñayuu cascuáha jíin rí, te súcuan nácuñi ñayuu jeē yóhoyo cújéhnū Tatá rī. <sup>9</sup>Nájñūhun

manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jnūhun manī rī jíin ró. <sup>10</sup>Núu squícu ró jniñu ní ndacu ri nuū rō, te níni coo manī rī jíin ró, nájnūhun máá rí squícu ri jniñu ní ndacu Tatá rī nuū rī, te níni íyó mánī yā jíin rí.

<sup>11</sup>'Súcuan ni cahān rī jíin ró návaha coo sīi ni rō nájnūhun íyó sīi ni rī, chi nde cusīi teyí ni rō. <sup>12</sup>Te yāha cúu jniñu ndacu ri nuū rō jijnáhan ró: jeē na cúndáhú ni rō jnáhan ró nájnūhun cúndáhú ni rī rohó. <sup>13</sup>Núu ñin tēe cuu de jehē amigo de, te tuá na vé cúmanī gā sáha de jeē cundáhú ni de amigo de. <sup>14</sup>Te máá ró cácuu amigo rī núu squícu ró jniñu ndacu ri nuū rō. <sup>15</sup>Ma cahān gā rī mozo jíin ró, chi ñin mozo tu cástūhún patrón nuū i ndese jéni ni de sáha de. Chi sa suhva amigo cahān rī jíin ró, chi je ni castūhun rí nuū rō tāca jnúhun ni cahān Tatá rī jíin rí. <sup>16</sup>Máá rí ni nacāji rōhó jēē jnáma ri rohó, te nasūu máá ró ni cánacani ni xīhna gā jeē cóndiquin rō ruhū. Te ni jeni rī rohó jēē caca ndaā rō te scándíje ró cuéhē ñayuu jeē cuu i sēhe ri níi cáni. Te súcuan te ndíhi jeē cacán rō nuū Tatá rī siquī jeē cácandíje ró rúhū, sáha ya jeē jicán rō. <sup>17</sup>Te yāha cúu jniñu ndacu ri nuū rō: jeē na cúndáhú ni rō jnáhan ró.

**Jeē cáquitī ni ñayuu ñayiví núu Jesús jíin núu ñayuu cácandíje**

<sup>18</sup>Te núu cáquitī ni ñayuu ñayiví núu rō jijnáhan ró, te je cájini rō jeē xīhna gā nuū máá rí ni caquitī ni i. <sup>19</sup>Te núu jeē íyó gá rō jíin modo ñayuu ñayiví, te coo manī ñayuu

ñayiví jíin ró nuú, nájnūhun manī i jíin jnáhan i. Te ni nacāji ri rohó jēē tuá coo ró jíin modo ñayuu ñayiví. Te jeē yúcuan cáquitī ni i nuū rō, chi tuá cácuu ró cuenta ñayiví. <sup>20</sup>Nucūhun ni rō jnūhun ni cahān rī jíin ró: Núu tu íyó yíñūhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jēē cácuu ró mozo rī. Te núu jeē ni cájetáhú i jnūhun ni steén rī, te suni cuatáhú i jnūhun cástéén rō. <sup>21</sup>Te tāca jniñu yáha sáha i jíin ró jeē siquī ruhū, chi tu cájini i Yaā ní tají rúhū vēji ri.

<sup>22</sup>'Núu jeē tu ní quíji ri nacani ri jnūhun nuū i, te ma cóo cuēchi i núu. Te vijna chi ma cúu ga cahān i jeē tu jíin i jeē íyó cuēchi i. <sup>23</sup>Ñayuu jeē cáquitī ni nuū rī, suni nuū Tatá rī cáquitī ni i. <sup>24</sup>Núu jeē tu ní sáha ri jniñu jéhnu nuū i jeē ní ñin tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tatá rī. <sup>25</sup>Te súcuan cásáha i návaha squícu jnūhun yósó núu tútu ley Yaā Dios jeē cánevaha i: Ni caquitī ni i nuū rī, vēsú tú na cuēchi ri, achí.

<sup>26</sup>'Te tají rí maá Yaā chindéé ñáhán rōhó te sáha ya jeē cóo sīi ni rō. Te Yaā un cúu máá Espiritu jeē steén jnūhun ndaā, te quiji ya nde nuū Tatá rī, te nacani cáji yá jnūhun ri. <sup>27</sup>Te suni máá ró nacani ró jnúhun ri, chi je cáhiin ro jíin rí nde ná ni quejéé rí nácani ri jnūhun.

**16** 'Tāca jnúhun yáha ní cahān rī jíin ró návaha ma náyūhu ró jeē quíji jnūndóho.

<sup>2</sup>Chi quenehen i róhó jéē ma cuáha ga i jnúhun cone ró táca vehe i sinagoga. Te quee quivī jeē cahni i róhó, te cani ni i jeē iin jniñu váha ni sáha i nuū Yaā Dios. <sup>3</sup>Te súcuan sáha i jíin ró, chi tu cájini cuiti i máá Tátá rī ni máá rí. <sup>4</sup>Te ni cahān rī jnúhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

### Jniñu sáha Espíritu Santo

Te tu ní cáhān rī jnúhun yáha jíin ró nde xihna nūhún, chi íne máá rí jíin ró jijnáhan ró. <sup>5</sup>Te vijna chi nuhūn rī condee rī jíin Yaā ní tají rúhū vēji ri. Te ni iin ró tu cájnūhun ró ndé nuū quihín rī. <sup>6</sup>Chi máá jéē cácuuíhyá ndasí ni rō jeē ni cáhān rī súcuan jíin ró. <sup>7</sup>Jendaá cahān rī jíin ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yaā chindéé ñáhán róhó te sáha ya jeē cóo sīi ni rō. Te núu cuahān rī, te tají rí yā quíji ya nuū rō. <sup>8</sup>Te jeē quée yā, te stéén yā nuū ñáyuu ñayīvi jéē iyó cuéchi i, jíin ndese quivīcoo i ichi ndaā, jíin jéē sándaā Yaā Dios siquī cuéchi i. <sup>9</sup>Stéén yā jeē iyó cuéchi i, chi tu cácandíje i ruhū. <sup>10</sup>Te stéén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī. <sup>11</sup>Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū máá jéxeén jeē cujéhu ini ñayīvi yáha.

<sup>12</sup>Te íyó cuéhē gā jnúhun cúní rī cahān rī jíin ró, te ma cúu jecūhun ni rō vijna. <sup>13</sup>Te jeē quée maá Espíritu jeē steén jnúhun ndaā, te

máá yá steén táca jnúhun ndaā un núu rō. Chi ma cahán yā jeē maá yá, chi cahān yā táca jéē jíni sōho ya cahán Yaā Dios. Te steén yā siquī táca jniñu jeē coo. <sup>14</sup>Te steén yā jeē cujéhu ri, chi nacastūhun yá nuū rō táca jnúhun jeē jé ni cahān rī, te sáha ya jeē jécūhun ni rō. <sup>15</sup>Ndihī ndese cújéhu Tátá rī, suni súcuan cújéhu máá rí. Jeē yúcuan ní cahān rī jeē Espíritu Santo nacastūhun yá nuū rō táca jnúhun jeē jé ni cahān rī, te sáha ya jeē jécūhun ni rō jijnáhan ró.

### Vēsú cácuuíhyá ni rō, te ndusiī ni rō

<sup>16</sup>Jecu na te ma cóto ga rō nuū rī. Te jecu tucu quivī te coto tucu ró núu rī, chi quínuhun rī nuū ndeé Tátá rī. Achí yá.

<sup>17</sup>Yūcuán na te sava tēe cáscuáha jíin yá, ni cacajnūhun jnáhan de:

¿Na jnúhun cúu jeē yáha jeē cahán yā jíin yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chi siquī jeē quínuhun yā nuū ndeé Tátá yā. <sup>18</sup>¿Na jnúhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

<sup>19</sup>Te ni jini Jesús jeē cácuni de cajnúhún de ya. Te ni cahān yā jíin de:

¿A cacajnūhun jnáhan ró na vé cúu jeē ni cáhān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núu rī? <sup>20</sup>Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayīvi chi sa cusīi ni i. Te vēsú cucuíhyá ni rō, te sa ndusiī ni rō jeē cóto tucu ró núu rī.

<sup>21</sup>Īn ñahan núu cuacuyajni scácu ña, te jéhnde chíji ña, chí je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chí cúsī ni ña jeē ní cacu sēhe ña. <sup>22</sup>Te suni súcuan cúu jeē cándoho ró vijna, chí cácuuīhyá ni rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni ĩn ma cúu casi jeē cúsī ni rō.

<sup>23</sup>Te quivī ún chí tú na vé cacān gā rō nuū rī. Chí jendaá cahán rī jíin ró jeē nuū maá Tátá rī cacān rō, te sáha ya ndīhi jeē cájicān rō, siquī jeē cáandíje ró rúhū. <sup>24</sup>Nde vijna te ná tu cacān rō nuū Tátá rī jeē jíin síhvī rí. Te vijna te na quejéé ró cacān rō jíin síhvī rí, te nihīn rō, návāha cusī ndasí ni rō.

### Je ni quende yā poder ndīhi jeneé cáhiyo ini ñayiví

<sup>25</sup>Tāca jnúhun yáha ní cahān yatá rí jíin ró. Te quee quivī jeē ma cahán yatá gā rī jíin ró, chí sa suhva castūhun cájī rí nuū rō siquī Tátá rī. <sup>26</sup>Te quivī ún chí cacān rō nuū Tátá rī siquī jeē cáandíje ró rúhū. Te tu cáhán rī jíin ró jeē cacān tahú rī jehē rō nuū Tátá rī. <sup>27</sup>Chí máá Tátá rī je cúndáhú ni yā rohó siquī jeē cáhiyo manī rō jíin rí, te ni cacandíje ró jéē ndé nuū maá yá vēji rí. <sup>28</sup>Ni quenda rí nde nuū Tátá rī, te ni quee rī ini ñayiví. Te vijna te quenda rí ini ñayiví, te nuhūn tucu rí nuū Tátá rī. Achí yá.

<sup>29</sup>Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní. <sup>30</sup>Vijna te cájini na jéé jiní ni ndivii cuiti, te tuá jini

ñúhún jeē cájnúhún ni ĩn ná níhín. Jeē yúcuan cáandíje ná jéē vēji ní ndé nuū Yaā Dios. Achí de.

<sup>31</sup>Te ni cahān Jesús jíin de:

¿A ndé vijna te cáandíje ró naún? <sup>32</sup>Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chí Tátá rī íne ya jíin rí. <sup>33</sup>Tāca jnúhun yáha ní cahān rī jíin ró návāha coo ndeyí coo sí ni rō siquī jeē cáandíje ró rúhū. Ini ñayiví chí cánuú coto ró jnúndóho. Te vēsú súcuan te na cóo sí ni rō, chí je ni quende rī poder tāca jenéé cáhiyo ini ñayiví. Achí yá.

### Jeē ni jicān tahú Jesús jehē ñayuu cáandíje

**17** Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quivī jeē ndóho ná. Vijna te stéén ni jéē cujéhnú máá ná jeē cúu ná Séhe ní, návāha suni máá ná steén na jéē cujéhnú máá ní. <sup>2</sup>Chí ni sáha ní jéē ndíso jníñu ná síquī tāca ñayuu, návāha tāca ñayuu jeē ni jéhe ní núu ná, cotecu i ní cáni sáha ná. <sup>3</sup>Te suhva cúu jnúhun cotecu i ní cáni: suu jeē na cúni i níhín jéē mañúhún-ni ní cúu Yaā ndaá, jíin jéē cúni i saña jeē cúu ná Jesucristo, Yaā ní tají ní.

<sup>4</sup>Je ni steén na núu ñayuu ñayiví jéē cujéhnú ní, te je sínu ná jniñu ní ndacu ní núu ná. <sup>5</sup>Te vijna, Tátā, sáha ní jéē ndujéhnú tucu ná ndé nuū néne ní, nájnúhun cújéhnú ná jíin ní nde ná tu jecōo ñayiví.

<sup>6</sup>Ñayuu jeē ní nacāji ní ini ñayiví, ni jéhe ní i nuū ná, te ni steén na



nūū i ndese Yaā cúu ní. Cuenta maá ní cúu i, te ni jēhe ní i nuū ná. Te ni cajetáhú i jnūhun ní, te ni casquícu i. <sup>7</sup>Te vijna te cájini i jeē ndé nuū maá ní vēji tāca jēē iyó jíín ná. <sup>8</sup>Chi tāca jnūhun ni cahān ni jíín ná, ní castūhun ná nūū i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají sāña.

<sup>9</sup>Te jícán tahu na jéhē maá i jíínáhan i. Tu jícán tahu na jéhē ñáyuū ñayīvi jēē tu cácandíje, chi sa jehē maá ñáyuū ni jēhe ni nūū ná, chi cuenta maá ní cácuu i. <sup>10</sup>Te tācá i jeē yíhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnū ná.

<sup>11</sup>Te tuá condee ná ini ñayīvi. Te máá i chi quendōo i ini ñayīvi, te máá ná chi najeē ná condee na jíín ní. Yaā iī Yaā ndoo cúu ní, Tātā. Te jíín poder ní condito ní tāca ñáyuū ni jēhe ni nūū ná, návāha inuú na cóo ni i jíínáhan i, nájnūhun cúu máá yó. <sup>12</sup>Te jeē ní condee na jíín i ini ñayīvi, te jíín poder ni ní condito ná i. Tāca ñáyuū ni jēhe ni nūū ná, ni condito yúcún ná i. Te tu ní jēhe na jnūhun naa i jíínáhan i, chi máá iin-ni tēe jeē je cúu de tēe jnahnū ndetū, návāha squícu jnūhun yósó nūū tútu iī.

<sup>13</sup>Te vijna te najeē na nūū ní, te cáhán na tāca jnūhun yáha jíín i níni jēē íne ga ná ini ñayīvi, návāha na cóo sīī ndasí ni i nájnūhun cúsiī ni maá ná. <sup>14</sup>Ni castūhun ná jnūhun ní nūū i. Te ni caquítī ni ñayuu ñayīvi nūū i, chi tuá cácuu i cuenta ñayīvi, nájnūhun máá ná

tu cúu ná cuenta ñayīvi. <sup>15</sup>Te tu jícán tahu na jēē quénehen ní i ini ñayīvi, chi sa suhva jeē cóndito ní i nuū jexeén. <sup>16</sup>Nasūu cuenta ñayīvi cácuu i, nájnūhun máá ná jēē násūu cuenta ñayīvi cúu ná. <sup>17</sup>Jíín jnūhun ndaā ní te sáha ní jēē coo ndoo coo iī i nuū ní. Tāca jnūhun cáhán maá ní cúu jnūhun ndaā. <sup>18</sup>Te nájnūhun ni tají ní sāña ní quiji ná ini ñayīvi, suni súcuan tají ná i nacani i jnūhun ní nūū ñáyuū ñayīvi. <sup>19</sup>Te jehē maá i cúu jeē jēhe ná máá ná cuu ná, návāha suni máá i coo ndoo coo iī i nuū ni jēē jíín jnūhun ndaā.

<sup>20</sup>Te nasūu máá iin-ni jehē ñáyuū yáha jícán tahu na, chi suni jehē tāca gá ñáyuū jeē candíje i sāña nūu na cúni sōho i jnūhun jeē nácani máá i jíínáhan i. <sup>21</sup>Te jícán tahu na jēē inuú na cóo ni i jíínáhan i. Nájnūhun iin-ni cúu ní jíín ná, Tātā, te iin-ni cúu ná jíín máá ní, suni súcuan na cóo inuú i jíín yó. Te cúni na jēē inuú na cóo ni i, návāha na cándíje ñayuu ñayīvi jēē maá ní ni tají ní sāña. <sup>22</sup>Ni sajeéhnū ná i nájnūhun ni sajeéhnū ní sāña, návāha inuú na cóo ni i, nájnūhun inuú-ni cúu yó. <sup>23</sup>Te ndúú ná jíín i, te ndúú ní jíín ná, te súcuan te inuú cuítī coo ni i jíínáhan i. Yūcuán na te cuni ñayuu ñayīvi jēē maá ní ní tají ní sāña, jíín jēē maní ndasí ní jíín i nájnūhun maní ni jíín ná.

<sup>24</sup>Tātā, máá ní ni jēhe ní i nuū ná. Te cúni na jēē cóyūcú i jíín ná nuū cóndee ná, návāha coto i ndese luu cújéhnū ná ni sáha ní. Chi íyó maní ndasí ní jíín ná nde ná tu jecōo ñayīvi te nde vijna. <sup>25</sup>Yaā ndaā cúu ní, Tātā, te ñayuu ñayīvi tu jíín i



níhín, te máá ná chi jíní na níhín. Te ñayuu yáha chi cájini i jeē maá ní ni tají sáña. <sup>26</sup>Ni steén na núū i jíjnáhan i ndese Yaā cúu ní. Te stéén gā na súcuan nuū i, návāha na cóo manī ndasí i jíin jnáhan i, nájnūhun íyó manī ndasí ní jíin ná, te návāha condee ná ini anuá i. Achí yá.

### Jeē ní cajnií de Jesús

(Mt. 26.47-56; Mr. 14.43-50; Lc. 22.47-53)

**18** Te nuū ní cuu ni cahān Jesús tāca jnúhun yáha, te ni quenda ya jíin tée cáscuáha jíin yá, cuahān yā inga lado yuu Cedrón. Te yūcuan íyó iin huerto nuū ní quívi ya jíin tée cáscuáha jíin yá. <sup>2</sup>Te Judas, tēe jeē nastúu de ya, suni jíní de lugar un, chi cuehē jíinu ni nataca Jesús yūcuan jíin tēe cáscuáha jíin yá. <sup>3</sup>Te ni jinū de yūcuan jíin iin grupo soldado jíin jecu policía cándito templo, jeē ní catají sutū cácujeñhu jíin tēe grupo fariseo. Te cándiso de machete, te cájnií de linterna jíin yiti. <sup>4</sup>Te Jesús je jíní yā tāca jnúndóho jeē véji siquī yā. Te ni quenda ya ichi núu de, te ni cahān yā:

¿Ndé iin cánanducú ró?

<sup>5</sup>Te ni cacahān de jíin yá:

Jesús tēe ñuu Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíin tēe ún. <sup>6</sup>Te jeē súcuan ni cahān yā, máá rí cúu, te ni cajica yátá de, te ni cacotúu-ni de. <sup>7</sup>Yūcuán na te ni cajnúhún tucu ya de:

¿Ndé iin cánanducú ró?

Te ni cacahān de:

Jesús tēe ñuu Nazaret.

<sup>8</sup>Te ni cahān Jesús:

Je ni cachi rí jeē maá rí cúu. Te núu ruhū cánanducú ró, te máá-ni rí jnií ró, te tēe yáha na quíngoo de. Achí yá.

<sup>9</sup>Súcuan ni cuu návāha na squícu jnúhun jeē ni cahān yā jíin Tátá yā: Tu ní jēhe na jnúhun naa ni iin tēe jeē ni jēhe ni núū na, áchí yá. <sup>10</sup>Te Simón Pedro ndíso de iin espada.

Te ni tava de, te ni jehnde de sōho lado váha iin tēe nání Malco. Te tēe un cúu de mozo maá sūtū cujeñhu.

<sup>11</sup>Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēe ndóho rí jnúndóho yáha jeē ni sándaā Tátá rí jeē ndóho rí? Achí yá.

### Jeē ní indichi Jesús nuū sutū cujeñhu

(Mt. 26.57-58; Mr. 14.53-54; Lc. 22.54)

<sup>12</sup>Yūcuán na te tācá soldado un, jíin capitán de, jíin tāca policía tēe hebreo un, ni cajnií de Jesús, te ni cajihni de ya. <sup>13</sup>Te xihna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máá sūtū cujeñhu ga cuiyá ún. <sup>14</sup>Te suu de ni cachi nuū jnáhan de hebreo jeē cánuú jēe cúu iin tēe jehē nación de.

### Jeē ní cachi Pedro jeē tu jíní de ya

(Mt. 26.69-70; Mr. 14.66-68; Lc. 22.55-57)

<sup>15</sup>Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chi jíní jnáhan de jíin sūtū cujeñhu. Jeē yúcuán ní quívi de jíin Jesús ini patio vehe sutū

cujéhnú ún. <sup>16</sup>Te Pedro ni quendōo de yatā yehyí. Te máá tēe scuáha jéē jíní jnáhan jín sūtū cujéhnú ún, ni quenda de ni cahān de jín nāhan ndíto yéhyí, te ni squívi de Pedro ini patio. <sup>17</sup>Yūcuán na te nāhan ndíto yéhyí un ní cajnúhún nā Pedro:

¿A násūú ñin tēe scuáha jín tēe índichi nuū sutú un cúu ró?

Te ni cahān de:

Nasūu cúu ri, achí de.

<sup>18</sup>Te tāca mozo jín policíá un ní cascáyú de ñuhún jín tícāyí, chí mījin sáha. Te cáhiin de cánasaā de. Te suni índichi Pedro, násaā de jín táca tēe ún.

#### **Jeē ní stíchí sutū cujéhnú ún Jesús**

(Mt. 26.59-66; Mr. 14.55-64; Lc. 22.66-71)

<sup>19</sup>Te sutū cujéhnú un ní stíchí de Jesús ndé-ni cúu tēe cáscuáha jín yá, jín na jnúhun cúu jeē steén yā.

<sup>20</sup>Te ni cahān Jesús:

Níní ní cahān rī nuū chítú ñáyuu, ni cajini sōho ndíhi ñáyuu. Te níní ní steén rī jnúhun ini tēcá vehe ñi sinagoga jín ini templo cáhnu nuū ndutútú ndívii jnáhan yó hebreo. Te tú ni ñin jnúhun ní cáhán sāhi rí. <sup>21</sup>¿Te naun cájnūhun ró ruhú? Cajnúhun ñáyuu ní cajini sōho jnúhun ni cahān rī, te máá i cachi ndese ni cahān rī. Chí cájini i ndese ni cahān rī.

<sup>22</sup>Te jeē ni cáhán Jesús súcuán, te ñin policíá ndíto templo jeē índichi de yūcuán, ní caní-ni de nuū yā. Te ni cahān de jín yá:

¿A súcuán cáhán rō jín sūtū cujéhnú naún?

<sup>23</sup>Te ni cahān Jesús:

Núu ni cahān rī ñin jnúhun néé, cachi na jnúhun néé ní cahān rī. Te núu tu ní cáhán rī ñin jnúhun néé, ¿te naun cáni ró ruhú? achí yá.

<sup>24</sup>Yūcuán na te Anás, sutū cujéhnú un, ní tají de ya, núhni yā cuahān yā nuū Caifás, tēe cúu máá sūtū cujéhnú ga.

#### **Jeē ní cachi tucu Pedro jeē tu jíní de ya**

(Mt. 26.71-75; Mr. 14.69-72; Lc. 22.58-62)

<sup>25</sup>Te níní jéē súcuán cúu, te índichi-ni Pedro, násaā de yuñhún. Te ni cacahān jín de:

¿A násūú ñin tēe scuáha jín tēe un cúu ró, chí naún?

Te máá de tu ní cáchi de:

Nasūu cúu ri, achí de.

<sup>26</sup>Yūcuán na te ñin mozo sutū cujéhnú, jnáhan tēe jeē ní jehnde Pedro sōho, ni cahān jín de:

¿A násūu máá ró cúu jeē ní jito ri jín de ini huerto?

<sup>27</sup>Te Pedro tu ní cáchi tucu de. Te ni cana-ni líhli.

#### **Jeē ní índichi Jesús nuū Pilato**

(Mt. 27.1-2, 11-14; Mr. 15.1-5; Lc. 23.1-5)

<sup>28</sup>Yūcuán na te ni quendacoo de jín Jesús vehe Caifás, cuangoo de jín yá nde palacio tēe nación Roma jeē cúu gobernador. Te je cuacundijin. Te ñáyuu hebreo tu ní quívicoo i ini palacio, návaha tu stívi i ley i jeē cahán jeē ma quívi i ini vehe ñin ñáyuu jeē násūú hebreo cúu. Chí núu súcuán te ma cúu cuxíni i vico pascua jeē cóo ñnga quíví ún. <sup>29</sup>Yūcuán na te ni quenda Pilato, tēe cúu gobernador, ni cahān de jín i jínáhan i:

¿Na cuēchi cájicān rō siquī tée yáha?

<sup>30</sup>Te ni cacahān i:

Núu jeē násūu tée cúnéé cúu tēe yáha, te ma jnī ná de jeē quíndeca ná de nuū ni núú, áhí i.

<sup>31</sup>Te ni cahān Pilato:

Cuángoo jíjnáhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jéé cáhni ná ni ñin ñayuu.

<sup>32</sup>Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. <sup>33</sup>Te ni ndīvi Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

<sup>34</sup>Te ni cahān Jesús jíin de:

¿A cájnūhun ró ruhū jeē súcuan jéni ni maá ró, chí jéé ní cacastūhun ñáyuu hebreo nuū rō?

<sup>35</sup>Te ni cahān Pilato:

¿Chí tēe hebreo cúu ri jeē cúni rī? Ñayuu nación maá ró jíin sūtū cácujuhnu ni cachihí róhó ndaha ri. ¿Na vé ni sáha ró núu súcuan? Achí de.

<sup>36</sup>Te ni cahān Jesús:

Nasūu jéé ndácu ri jniñu nájñūhun cándacu tāca rey ñayīvi yáha. Chi núu jeē ñáyuu ñayīvi ní casáha jeē cúu ri rey, yūcuán na te tēe cándiquin ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

<sup>37</sup>Yūcuán na te ni cahān Pilato jíin yá:

¿Te á ñin rey cúu ró jéé súcuan?

Te ni cahān Jesús:

Rey cúu ri, nájñūhun cáhán rō. Ni quíji ri ni cacu ri ini ñayīvi yáha návāha nacani ri jnūhun ndaā. Te ndihí ñayuu cájetáhú jnūhun ndaā, cájini nahín i jnūhun cáhán rī. Achí yá.

<sup>38</sup>Te ni cahān Pilato:

¿Ndese cuni yō ndé ñin cúu máá jnūhun ndaā?

**Jeē ní cundaā jeē cúu yā**

(Mt. 27.15-31; Mr. 15.6-20; Lc. 23.13-25)

Te jeē ni cáhán de jnūhun yáha, te ni quenda tucu de nuū ñáyuu hebreo. Te ni cahān de jíin i:

Tú cuítí na cuēchi níhín rī siquī de. <sup>39</sup>Te íyó costumbre maá ró jíjnáhan ró jéé vico pascua te siaá rī ñin tēe íne vecāa nuū rō. ¿Te á tu cácu ni rō jeē siaá rī Rey rō nuū rō? Achí de.

<sup>40</sup>Yūcuán na te ndīvii i ni cacana jee tucu i:

Ma siaá ni tēe jíiná, chi Barrabás siaá ni, áhí i.

Te tēe cuíhná cúu Barrabás.

**19** Yūcuán na te ni cahān Pilato jeē na jnī soldado Jesús, te caní de ya jíin cuarta ñi. <sup>2</sup>Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jéé cúu sahma rey. <sup>3</sup>Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

<sup>4</sup>Yūcuán na te ni quenda Pilato inga jínu, te ni cahān de jíin ñáyuu: Yáhá condēhe ró tava rí de, návāha na cúni rō jeē tú na cuēchi níhín rī siquī de.

<sup>5</sup>Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíjnāhan ró.

<sup>6</sup>Te nuū ní cajito sutū cácujuhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najni máá ró de te cahni rō de. Chi ruhū, tú na cuēchi níhín rī siquī de.

<sup>7</sup>Te ni cacahān ñayuu hebreo un:

Cáneváha ná iin ley, te jeē siquí ley un cánuú jeē cúu de, chi sáha de máá de jeē Séhe Yaā Dios cúu de.

<sup>8</sup>Te jeē ní jini sōho Pilato jñūhun yáha, te víhyá gā ni yūhú de. <sup>9</sup>Te ni ndīvicoo tucu de ini palacio, te ni cajñūhún de Jesús:

¿Ndé nuū véji ró?

Te tu ní cáhán cuiti Jesús jíin de.

<sup>10</sup>Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jñíñu rī jeē cáhni rī rohó jicā cruz, te suni ndíso jñíñu rī jeē siaá rī rohó quíhín rō?

<sup>11</sup>Te ni cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró síquī rī. Jeē yúcuan tēe jeē ní nacuaña ruhū ndaha ró, cuēchi xeēn gā condee siquí de vésú máá ró. Achí yá.

<sup>12</sup>Yūcuán na te nde hora un ndúcu ndéyí Pilato ndese siaá de ya. Te ñayuu hebreo chi cácana jee i:

Núu siaá ni tēe jíñā, te tu cúu ní amigo rey Roma jeē cujéhu ndácu jñíñu núu súcuan. Chi táca tēe jeē sáha de rey máá de, núu súcuan te cúu de enemigo siquí rey un. Achí i.

<sup>13</sup>Te jeē ní jini sōho Pilato jñūhun yáha, te ni ndacu de jñíñu jeē na quénda Jesús ini vehe quiji ya. Te ni cucōo de silla nuū cúndaā jñíñu, nuū máni máá yúu ni jecāva, te lugar un nání Gabata nuū yúhu hebreo. <sup>14</sup>Te cuacuu cahuxī uū, te jehíni quivī ún quejéé vico pascua. Te ni cahān Pilato jíin ñáyuu hebreo:

Yāha índichi maá rey rō.

<sup>15</sup>Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jeē cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnāhan ná, chi máá-ni rey Roma jeē cujéhu ndácu jñíñu nuū ná.

<sup>16</sup>Yūcuán na te Pilato ni nacuaña de ya nuū i jeē na cúu yā jicā cruz. Te ni cajni i ya cuango o i jíin yá.

### Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

<sup>17</sup>Te ni quenda Jesús, ndíso ya cruz yā, cuango o de jíin yá iin lugar nuū naní Yiquí Xíní, te nuū yúhu hebreo naní Gólgota. <sup>18</sup>Te yúcuan ní cacata caa de ya jicā cruz. Te suni ni cacata caa de uū tēe nuū uū gā cruz, iin iin de iin lado yā, te máá Jesús mēhñú. <sup>19</sup>Te suni ní ndacu Pilato jñíñu jeē na cóndee jñūhun xiní cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. <sup>20</sup>Te cuehē ñayuu hebreo ni cacahu i jñūhun yáha, chi máá jajni yuñúú cúu nuū ní cacata caa de ya. Te jñūhun un

yósó jíin yuhu hebreo jíin griego jíin latín. <sup>21</sup>Te tāca sūtū cácujuhnu nuū ñayuu hebreo, ni cacahān de jíin Pilato:

Ma tée ní jée cúu de Rey ñayuu hebreo, chi sa suhva tee ní jée maá de ni cahān jeē cúu de Rey ñayuu hebreo.

<sup>22</sup>Te ni cahān Pilato:

Ma násama ri jeē jé ni ndacu ri jniñu ni jecondee.

<sup>23</sup>Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te iin iin parte ni cuu iin iin soldado un. Te suni ni caquihin de camisa yā. Te camisa un tu ní quícu, chi ni cunu níí. <sup>24</sup>Te ni cacahān maá de:

Ma cáhnde yō, chi vāha ga na sáha yó sorteo, te na cóndēhe yó ndé iin yó níhīn, achí de.

Te súcuan ni squícu jñuhun yósó nuū tútu iī nde jenahān jée cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

<sup>25</sup>Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. <sup>26</sup>Te ni jito Jesús nuū naná yā jíin núu tée scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuñī de cuu de sēhe ní.

<sup>27</sup>Yūcuán na te ni cahān yā jíin tée scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

### Jeē ni jíhī Jesús

(Mt. 27.45-56; Mr. 15.33-41; Lc. 23.44-49)

<sup>28</sup>Yūcuán na te ni jini Jesús jeē jé ni jinu tācá jniñu jeē cánuú ndoho ya. Te návāha squícu jñuhun cáhān tutu iī, te ni cahān yā:

Jíchí rī ndute, áchí yá.

<sup>29</sup>Te yūcuan íin iin tindhō ñuhun chitú vinagre iyá. Te ni cachundaji de iin cachí nuū vinagre un, te ni catee de xinī iin ndaha yújnu hisopo, te ni catee de yuhu ya jeē cóho ya. <sup>30</sup>Te ná ni jihī ya vinagre un, te ni cahān yā:

Je ni jinu, áchí yá.

Te ni cāyī-ni xinī yā, te ni jihī-ni ya.

### Jeē ní cují soldado lanza xiin ya

<sup>31</sup>Te inga quivī ún coo vico pascua. Te tēe hebreo tu cácu ni de jeē cóndita caa ndēyi ún jicā cruz quivī ndétátú un. Chi quivī ndétátú jeē cúu vico pascua, iī ndasí gá vēsú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhin tēe cándita caa, te na cújiyo de jicā cruz. <sup>32</sup>Te ni quecoo soldado, te ni cajehnū de sīhin iin tēe jeē ndíta caa jíin yá, te suni súcuan inga de. <sup>33</sup>Te nuū ní quecoo de nuū Jesús, te ni cajito de jeē jé ni jihī yā. Jeē yūcuan tu ní cájehnū de sīhin ya.

<sup>34</sup>Te iin soldado chi ni cují de lanza xiin ya, te ni cane-ni niñī jíin ndute. <sup>35</sup>Te máá rí jeē tée tutu yáha, ni jito ri jeē súcuan ni cuu, te nácani ndaā rī jñuhun ndese ni cuu. Te jíní ri jeē iyó ndaā jñuhun cáhān rī, návāha suni candíje máá ró jijnáhan ró. <sup>36</sup>Chi súcuan ni cuu

návāha squícu jnūhun cáhán tutu ii: Ma cahnú de ni iin yiqui ya, achí. <sup>37</sup>Te suni inga jnūhun cáhán tutu ii: Iin quiví te coto i nuū Yaā jeē ní cují i lanza, achí.

### Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

<sup>38</sup>Te ni cuu tāca jéē yáha. Te íyó iin tēe nūu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jíin Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús. <sup>39</sup>Te suni ni jinū Nicodemo, tēe ni quiji nuū Jesús iin jecuáā. Te ndíso de nájñūhun ocō uxī kilo sūje uvuā jeē ní saca jnáhan jíin yúcū áloe. <sup>40</sup>Te ndíndúú de ni caquihin de yiqui cúñu Jesús, te ni cachusúcún de jíin tira sahma jeē ni quíví yucū jeē jeén asīn ún, nájñūhun íyó costumbre maá náyuu hebreo jeē cáchindūji i ndīyí. <sup>41</sup>Te yajni nuū ni jíhī Jesús íyó iin huerto. Te nuū huerto un ndéé iin yaū jeē ní caan jeé jicā iin cava, nuū ná tu quindūji ndīyí. <sup>42</sup>Te yūcuan ní cachindūji de Jesús, chi ine yajni yaū ndīyí ún. Chi je yajni quejéé quíví ndétátú de jeē cácuu de ñayuu hebreo, te tú na ley chindūji de ndīyí núu je ni quejéé quíví ún.

### Jeē ní natecu Jesús

(Mt. 28.1-10; Mr. 16.1-8; Lc. 24.1-12)

**20** Te jenéhen quiví domingo ni jinū María ñuu Magdala nuū ní yindūji Jesús, te yínee gā

cúu. Te ni jito ña jeē ní cujiyo yuū ndihyú yuyáú ndīyí. <sup>2</sup>Yūcuán na te jínu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

<sup>3</sup>Te ni quendacoo Pedro jíin inga tēe scuáha ún, cuácondéhé de yaū ndīyí. <sup>4</sup>Te cájino tayí ndíndúú de. Te inga tēe scuáha ún, nīhin ga ni jinu de vēsú Pedro. Te xihna gā de ni jinū yaū ndīyí. <sup>5</sup>Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quíví de. <sup>6</sup>Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quíví de nuū ní yindūji Jesús. Te suni ni jito de jeē tira sahma cáyūcu máá na. <sup>7</sup>Te ni jito de sahma jeē ni ñúsúcún xíní Jesús, tu cátú jíin tira sahma, chi ni natuu te cátú sīn. <sup>8</sup>Yūcuán na te suni ni quíví inga tēe scuáha jeē ni jínu xihna gā nuū ní yindūji ya. Te ni jito de ndese íyó, te ni candíje de jeē ní natecu yā. <sup>9</sup>Chi nde ná tu jinūcoo de yaū ndīyí, te tu ní jécūhun ni de jnūhun cáhán tutu ii, jeē jíni ñúhún natecu yā núu je ni jihí yā. <sup>10</sup>Yūcuán na te ndíndúú tēe cáscuáha ún cuanungoo de vehe de.

### Jeē ní nane ya nuū María ñuu Magdala

(Mr. 16.9-11)

<sup>11</sup>Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún. <sup>12</sup>Te ni jito

ña uū ndajéhé andiví, cáñuhun ya sahma cuijín. Te ìin ya néne ichi xíní, te ìnga ya néne ichi núú jehé nuū ni cátu yiqui cúñu Jesús. <sup>13</sup>Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jítoho ná, te tu jíiní na ndé nuū ní cachune de ya.

<sup>14</sup>Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē maá yá cúu. <sup>15</sup>Te ni cahān yā jíin ña:

¿Najehē ndahyú rō? ¿Nde ìin nánducú ró? achí yá.

Te maá ña jéni ni ña jeē téé ndíto huerto cúu ya. Te ni cahān ña jíin yá:

Núu maá ní ni quenehen ní yá, te cachi ní ndé nuū ni jéchine ní yá, te na quínuquihin ná yá, achí ña.

<sup>16</sup>Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jñuhun un cúní cahān, Maestro.

<sup>17</sup>Te ni cahān Jesús jíin ña:

Ma quehé ró rúhū, chi ná tu ndaa ri quínuhun rí nuū Tatá rí. Te cuáhán núú tǎcá hermano rí, tēe ni cascuáha jíin rí, te cachi rō nuū de jeē ndaa ri quínuhun rí nuū Tatá rí, jeē suni Tatá maá ró jijnáhan ró cúu. Te cúu ya Yaā Dios maá rí jíin Yaā Dios maá ró jijnáhan ró. Achí yá.

<sup>18</sup>Yūcuán na te María ñuu Magdala un, cuáhān ña, te ni castūhún ña nuū téé cáscuáha un

jeē ní jito ña nuū maá Jítoho yō jíin jeē ni cáhān yā jñuhun yáha jíin ña.

**Jeē ní nane ya nuū téé cáscuáha jíin yá**

(Mt. 28.16-20; Mr. 16.14-18; Lc. 24.36-49)

<sup>19</sup>Te jeē ní cuaa maá quívī domingo un, te cáhiin tútú téé cáscuáha ún ini ìin vehe. Te cándihyū yehyí, chi cáyūhú de jñáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, achí yá.

<sup>20</sup>Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñi ni tēe cáscuáha un jéē ní cajito de nuū maá Jítoho yō.

<sup>21</sup>Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájñuhun ni tají Tátá rí ruhū ini ñayīví, suni súcuan tájī rí rohó nacani ró jñuhun ri nuū ñayuu. Achí yá.

<sup>22</sup>Yūcuán na te ni tīvi tachī yā nuū de jijnáhan de. Te ni cahān yā:

Vijna te ni canihīn rō Espiritu Santo. <sup>23</sup>Te tǎca ñayuu jeē cone cáhnu ni rō nuū cuéchi i, núu súcuan te coo jñuhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jñuhun cáhnu ni nuū cuéchi i. Achí yá.

**Jeē ní nane ya nuū Tomás**

<sup>24</sup>Te Tomás, tēe ni cacu cuatí, ìin jñáhan jeē uxí uū tēe cáscuáha jíin yá, tu ní ìne de quívī jeē ní nane Jesús nuū tǎca gá tēe cáscuáha. <sup>25</sup>Yūcuán na te sava ga



tēe cáscuáha un, ní cacahān de jíin Tomás:

Ni cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti ri, achí de.

<sup>26</sup>Te nuū uná quivī, te tēe cáscuáha un cáhiin tútu tucu de ini iin vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñi coo ni rō jijnáhan ró.

<sup>27</sup>Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáa ndaha ró, te chune ró xiin ri nuū ni túji. Te ma cáni siquí gá ni rō, chi sa suhva na cándíje ró.

<sup>28</sup>Yūcuán na te ni cahān Tomás jíin yá:

Aí, Jítóho maá ná jíin Yaā Dios maá ná cúu ní, achí de.

<sup>29</sup>Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

### Najehē ni tee Juan libro yáha

<sup>30</sup>Te suni ni sáha Jesús cuehē gā jniñu jéhu jeē ni stéén yā poder yā nuū tēe cáscuáha jíin yá, jeē tu yósó núu tútu yáha. <sup>31</sup>Te tācá jniñu yáha ní tee ri návāha candíje ró jijnáhan ró jēe Jesús cúu Cristo, maá Séhe Yaā Dios. Chi jeē candíje ró yá, te cotecu rō níí cáni sáha ya.

### Jeē ní nane ya nuū uxá tēe cáscuáha jíin yá

**21** Te ni cuu jecu quivī, te inga jínu ni nane Jesús nuū tēe cáscuáha jíin yá, jeē cáhiin de yumar Tiberias. Te suhva ni steén yā maá yá nuū de: <sup>2</sup>Cáhiin tútu Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañúu Galilea, jíin ndindúu séhe Zebedeo, jíin úu gā tēe cáscuáha. <sup>3</sup>Te ni cahān Simón Pedro jíin de jijnáhan de:

Quíjni ri chācá.

Te ni cacahān de:

Suni quingoo ri jíin ró.

Te cuangoo de, te ni quivícoo de iin barco. Te tu ní cánihin cuiti de ti jecuáa yúcuán. <sup>4</sup>Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. <sup>5</sup>Yūcuán na te ni cahān yā jíin de:

Aá rō jijnáhan ró, zá ní canihin rō chācá caji yō?

Te ni cacahān de:

Tú cuiti, achí de.

<sup>6</sup>Yūcuán na te ni cahān yā jíin de: Síngava ñunu ró ichi lado váha barco, te nihin rō tī.

Te ni casíngava de ñunu, te tuá ní cúu cuiti natava de, jeē ni quivícoo cuehē ndasí chāca. <sup>7</sup>Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. <sup>8</sup>Te tāca gā tēe cáscuáha ún, vendicoo

de jíin barco yundúte, cástáa de ñunu ñúhun chítú cháca. Chi tu jíicá cáhiin de jíin ñuhun íchi, chi nájnūhun ciento-ni metro cúu. <sup>9</sup>Te nuū ní quendacoo de ini barco, te ni cajito de jeē nduhvá tícuva ñuhūn, te íne staā jíin iin chācá chíhyó.

<sup>10</sup>Te ni cahān Jesús jíin de:

Cuáquihin jecu chācá jéē sa ní cajnií ró, na táu yó, áchí yá.

<sup>11</sup>Te ni quíiví Simón Pedro ini barco, te ni stáa de ñunu, ni quee de jíin ndé nuū ñúhun íchi. Te ñúhun chítú cháca náhnu, iin ciento uū xico uxí uní tī cúu. Te vēsú iin súcuán tí ñúhun, te tu ní táhndé ñunu. <sup>12</sup>Te ni cahān Jesús jíin de:

Nehen jijnáhan ró na cási ni yō.

Te ni iin tēe cáscuáha ún tu ní cúndeyí ni de cajnūhún de ya núu ndé iin cúu ya. Chi je cájini de jeē maá Jítoho yō cúu ya. <sup>13</sup>Te ni quindēhe Jesús yuñúhún, te ni quihin ya staā ún, te ni jēhe ya nuū de, te suni súcuán chācá un.

<sup>14</sup>Yāha cúu vuelta uní jeē ní nane Jesús nuū tēe cáscuáha jíin yá, ná ni natecu yā.

### Jeē ní ndajnūhún Jesús jíin Simón Pedro

<sup>15</sup>Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, íá mání gā rō jíin rí vēsú tāca gá tēe yáha?

Te ni cahān de:

Je jíin ní jéē maní na jíin ní, achí de.

Te ni cahān yā jíin de:

Núu súcuán te stéén rō jnūhun ri nuū ñáyuu cácuu nájnūhun londe ri.

<sup>16</sup>Te ni cajnūhun yá de vuelta uū:

Simón sēhe Jonás, íá mání rō jíin rí?

Te ni cahān de jíin yá:

Je jíin ní jéē maní na jíin ní, achí de.

Te ni cahān yā:

Condito rō ñáyuu cácuu nájnūhun lanchi ri núu súcuán.

<sup>17</sup>Te ni cajnūhún tucu ya de vuelta uní:

Simón sēhe Jonás, íá mání rō jíin rí?

Te ni cucuíhyá ni Pedro jeē ní cajnūhun yá de vuelta uní núu maní de jíin yá. Te ni cahān de:

Máa ní jiní ni ndíhi, te jíin ní jéē maní na jíin ní.

Te ni cahān yā:

Núu súcuán te stéén rō jnūhun ri nuū ñáyuu cácuu nájnūhun lanchi ri. <sup>18</sup>Te jendaá cahān rí jíin ró jeē nde ná suchí ró, te ni quihin máa ró sahma ró, te ni jica ró ndé nuū cuní maá ró. Te núu na yíi ró, te nasūu jéē cuní maá ró, chi inga ñáyuu quindēca i róhó nuū tu cúní rō quihin rō. Te scáá rō ndíndúú ndaha ró jéē cuu rō.

<sup>19</sup>Jnūhun yáha ní cahān yā jeē ni stéén yā jeē cóndita caa de jíicá cruz cuu de, te jeē súcuán cuatáhú de cúu jeē steén de jeē yóhyo cújéhnu Yāa Dios. Yūcuán na te ni cahān gā yā:

Condiquin rō ruhū jeē sáha ró jniñu ní ndacu ri nuū rō, achí yá.

### Jnūhun tēe scuáha jeē maní gā yā jíin

<sup>20</sup>Te ni ndíó cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni

cacuxíni de jíin yá, te ni cajnúhún de ya: ¿Ndé ñin de cúu jeē nastúu níhín? <sup>21</sup>Te jeē ní jito Pedro nuū téé ún, te ni cajnúhún de Jesús:

Te tēe yáha, ¿ndese coo jíin de?

<sup>22</sup>Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

<sup>23</sup>Yūcuán na te jnúhun yáha ní jítē núu nuū tācá hermano, jeē téé scuáha un má cúū de. Te tu ní cáhán Jesús jeē ma cúū de, chi sa

suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

<sup>24</sup>Te tēe scuáha un jēē maní gā Jesús jíin, suu cúu ruhū jeē nácani jnúhun tācá jniñu yáha, te suu ri téé tāca jnúhun yáha. Te cájini rō jijnáhan ró jēē iyó ndāā jnúhun nácani ri.

<sup>25</sup>Te suni íyó cuéhē ndasí gá jniñu ní sáha Jesús. Te núu tee yó ná ñin ná ñin, te ma cánda níí ñáyiví cuhun tutu jeē cóso jnúhun ún, jéni ni rī. Te ni cuu. Amén.